

遼陽縣志

戊辰夏  
比頌

詩志卷三十九

和乞菊 晚香齋詩稿下同

韓天垣 紫庭

茅籬怪底又增新昨日籬邊太守巡  
名宦名花相對處應從花裏悟前身  
籬下秋光日日添虛堂應自捲珠簾  
貪名貪利誰貪此貪得名花便是廉  
詩成如錦字如花手筆端稱燕許家  
乘興題花花佐酒平分秋色在官衙  
日對金英酌玉甌名花端的笑儂不  
同心更有清高客太守風流第一流

知州章朝勅乞菊詩四首 附

聞君三徑好花新日日花開醉幾巡  
料得敲門無俗客箇中難著宰官身  
蕭齋寂寞客愁添佳節無聊獨捲簾  
珍重寄言陶令尹為花低首不傷廉  
能甘淡泊是黃花位置端宜處士家  
拙宦不愁花見哂十分淡泊是官衙  
報瓊預備酒盈甌未識名花割愛不  
一卷新詩聊作券這番交易太風流

和乞菊

張玉綸

新詩兩副劇清新  
雜誦回環日幾巡  
不是花中偏愛菊  
陶公肯屈宰官身  
告天香是夜來添  
白水青山日捲簾  
幾朵黃花仍待乞  
爭教五袴不謳廉  
獻佛嘗聞尙借花  
何妨悉索部民家  
秋英也有修來福  
得聽鳴琴向退衙  
祇領山城水一甌  
淡如心事菊知不  
破題第一因花做  
乞相千秋據上流  
爲愛黃花晚節新  
幾回栽植幾回巡  
回頭一笑君知否  
我是此花身外身  
稀奇韻事這番添  
刺使吟詩日下簾  
說到癡心甚於我  
愛花成癖不傷廉  
秋風秋雨一枝花  
開到東籬第幾家  
不爲尋花淵明里  
何勞五馬出官衙  
詩盈囊篋酒盈甌  
人解愛花花解不  
詩好換花花換酒  
算來一樣是風流

和謝菊

重裁詩樣又翻新  
索稿人來日幾巡  
自愧家無花使者  
送迎勞我臥雲身  
雖然連日幾筐添  
花少何堪當下簾  
豈是主人偏吝與  
使君還取最清廉  
本是疎籬冷淡花  
偶因詩引到官家  
河陽大尹無多事  
想爲看花早放衙

韓天垣

心盟白水共擎甌如此交情淡也不爲換名花詩立券先生真箇是風流  
知州章謝菊詩四首附

分得秋英簇簇新端詳燥濕費逡巡公餘笑傲東籬下還我原來癩散身  
幾筐送到幾筐添日進名花不下簾投贈若教同縞紵與真傷惠取傷廉  
官况差同鏡裏花秋來寥寂倍思家多君頻把霜華贈贏得黃金燦冷衙  
詩成字字鑄金甌豔比黃花較勝不好句好花都割愛失便宜處是風流

和謝菊

寒英簇簇盼爭新抱甕勞勞那記巡博得好詩囊底滿這回不負灌園身  
體貼霜威漸次添虛堂時下却寒簾珠璣作聘瓊瑤報始信黃花價不廉  
羣推晚節此名花栽植偏宜處士家試爲寒英商出處東籬那便勝西衙  
新詩盈卷酒盈甌種菊情懷慰得不我亦有花誰過問名花聲價待名流  
故園辜負好花新此地相逢酒數巡任是清高彭澤令也應忙煞折腰身

張玉綸

幾種名花次第添留香不捲水晶簾堂前燦爛黃金滿可有花知太守簾  
此花端的異羣花淡影寒香自一家料得孤標羞附熱却應相伴在官衙  
月白風清酒一甌同心花許主盟不從今清福能消受爭似當年隱逸流

和酬菊

韓天垣

甕頭春熟正清新玉椀盛來那計巡倘醉華筵君莫笑高陽多有酒徒身  
邀得高朋滿座添虛堂今日早開簾須知此饌非容易太守延賓費俸廉  
能邀佳客是黃花邀集詞人十數家不遇武城賢令宰如何子羽到公衙  
筵開堂下酒斟甌未卜羣英至也不料得座間詞客滿再添花色助風流

知州章酬菊詩四首附

贈我花新詩更新酬君先勸酒三巡今宵好共談風月偷得清閒物外身  
同傾百榼教重添座對名花夜捲簾酒債未償詩債到債多羞說宰官廉  
詩成豔說乞黃花秋徧城鄉處士家

時和乞菊詩甚衆  
託紫庭攜以見示

若比催科應上考珠機環日日滿官衙

相邀花下倒金甌醒眼看花花笑不沈醉莫嫌歸去晚月華如水滿階流

和酬菊

張玉綸

好花翻樣句翻新想像當筵大白巡循吏通儒相對處淡香寒影兩閒身  
獻芹不過幾筐添邀客開樽累下簾爲問柴桑賢刺史香花供養豈傷廉  
仍是君家籬下花何期相賞郡侯家黃花此日黃應甚恰到黃堂太守衙  
東籬笑我自傾甌醉裏吟詩醒記不心遠地偏聊自遣敢希倡和附清流  
一詩酬得一花新大白浮來那計巡花認主人應解語別來無恙苦吟身  
遙知笑傲夜來添霜滿重檐月滿簾看到舊朝衣着處底須冷眼向堂廉  
屢做瓊筵約賞花幾多酒國幾詩家和陶愧我無佳句不見白衣人出衙  
獨坐籬邊手把甌問花猶識故人不河陽桃李潯陽菊畢竟誰居第一流

雪夜分韻得揉洲抽鈎游陬囚甌羞兜十字爲韻

王巽謙

和周

風雪互紛揉驚寒雁落洲官梅東閣信凍笋小園抽絮詠珠璣句簾空翡翠鈎毡毛憐共

咽驢背好耽游黃葉積山麓銀沙散海陬灞橋孤客與茅屋一詩囚鶴筆超塵世龍團品  
玉甌伊誰嫌冷落愧我飫珍羞記得行山棧崎嶇仗竹兜

雪夜拈得鳩浮樓偷猶酬搜牛坏由十字爲韻

韓 覲叔侯

曲聽鷓鴣手仗鳩雪飛梁苑客尊浮鋪平坎密成銀海剪碎瓊瑤罩玉樓龍戰長空鱗亂  
落鷗盤健翮眼頻偷游楊拱立袁焦臥各有情懷迥不猶

擊筑高歌互倡酬撒鹽飛絮句頻搜凌雲我愧冲霄鶴觸壁兒慙識字牛滿紙琳琅詩倚  
韻百年心事土盈杯漫誇雪夜黃泥坂未肯風流共子由

雪夜拈得籌廳猴驢稠喉劉疇尤幽十字爲韻

杜 森蘭溪

冒雪招清客折梅當酒籌雲陰添漠漠風影尙颺颺鬢已同栖鶴冠誰效沐猴安巢羞燕  
雀奮路讓驩躡掃徑頻攜笠畏寒戲擁稠敲詩搜笥腹豪飲潤吟喉詠絮長懷謝題糕却  
憶劉清光生院落豐瑞兆田疇世遠無塵俗身閒少怨尤醉眠方枕藉蝶夢共尋幽

再拈得條腰蕉挑燒五韻

王巽謙

鷺毛飛舞欲封條  
修竹凌空難折腰  
太尉但知飽羊酒  
右丞著意畫芭蕉  
冰凝硯尾詩還寫  
花結燈心手懶挑  
無處尋梅成恨事  
邊關野火近停燒

三拈得毫搔袍濤高五韻

前人

重拈險韻任揮毫  
華髮何堪對雪搔  
下酒新思燒鹿脯  
禦寒誰肯解緹袍  
山頭一色鋪成玉  
水面無聲凍結濤  
捲起毡簾門外望  
天空嘹唳雁飛高

四拈得衙叉茶牙鴉五韻

前人

憶昔臨湍侍退衙  
詩成詠雪韻尖叉  
寒煨楮柚人呼酒  
夜理琴書客品茶  
翠竹幾竿搖屋角  
白梅一樹出檐牙  
卅年陳迹慵回首  
但看城頭飛暮鴉

王巽謙

雪夜與叔侯蘭溪鵠臣仲篤以獨釣寒江雪分韻

得獨字

一夜骨生寒雪光滿白屋  
洗盡炎歊心超然守吾獨  
嶺上老梅開牀頭新釀熟  
詩酒具別腸冰天豁雙目  
一色望無垠白頭千樹禿

得釣字

韓覲



飛雲散天花清景可憑眺  
主人招酒狂開尊恣歡笑  
維摩韻尖义元直作長嘯  
或行東郭吟或學張顛叫  
狂態不自知一任旁觀誚  
醉鄉別有天籍伶己先導  
詩崇與愁魔此地應難到  
踏雪歸去來明朝約垂釣

得寒字

杜森

分韻圍鑪坐聯吟忘夜寒  
瓊瑤鋪滿徑青翠失層巒  
寺遠鐘聲隔天空雁影單  
蠻奴亦知趣活火煮龍團

得江字

韓博文

凍雲低沍壓寒江擘絮抽  
棉撲滿窗風緊獨維漁父艇  
曲高同聽郢人腔縱教墮  
落形偏潔底是飛揚氣不  
降安得小紅時勸酒任他  
局外話紛囀

得雪字

徐材

天公動詩興向我索一絕  
還怕泣鬼神欲言舌又拙  
搔首仰問之驚破凍雲裂  
天公笑口開謂此詩可說  
竟夕縱劇談霏霏落玉屑  
朝來尋言筌化作一庭雪

雪晴與仲篤叔侯鵠臣小飲以快雪時晴分韻得快字

王巽謙

連日作雪詩詩意頗清快雪晴詩更新或免天公怪策蹇過城隅溪山景如畫巷口銀沙堆檐牙冰箸挂凍鯉和冰挑野雉帶血賣人皆有運營我獨失廉介性豈與人殊惟恐觸機械故人知我深相見無俗話日坐清風中恍如破甕贖吾友多高節風流同一派簞食而瓢飲能凜夫子戒騎鯨笑李白割豕壯樊噲方今用武時膽氣仗豪邁大吏秉至公小醜乃癘疥淮陰昔將兵成功等拾芥謀定而後發立地於不敗我蓄志未酬姑守畫虎誠寶劍近寒光茅屋苦湫隘風動暗香來梅花添宿債對此數點花怡然甘下拜

贈杜蘭溪又以時字爲韻

韓伯文

羨煞風流杜牧之竹鑪茶盞恰相宜學書偶試新濡筆分韻重敲未就詩步月桐階鴉睡後開尊菊圃蟹肥時論交許訂三生友一片冰水更與誰

雪復大作感成十二韻

王巽謙

昨宵爛醉歸彤雲斂天表夜半風送寒霏霏復到曉不雪人咨嗟既雪人呼小人心未易

足天心亦何巧我生不治田早早勞無所禱我材同樗櫟飯欲弗求飽興到吟小詩差堪慰  
潦倒當茲冷落中輟眠起頗早無分著貂冠頽然擁破襖小鑪茶旋烹盈階葉慵掃飛鳴  
聽斷鴻孤棲匿寒鳥一笑仰穹蒼心頭更了了

前作未盡所懷再成十二韻

前人

雪花大如手頃刻盈千畝天公憐我貧遣我特從厚對之可讀書烹之可當酒讀書致顯  
官能持印如斗飲酒破萬愁清冽潤苦口不見市井兒蠅營復狗苟薪米比桂珠藉天爲  
利藪我年已不惑堅持清操久移此心治民或不負抱負俄聞剝啄聲驢背一老友疑是  
送炭來掉頭曰否否

和圃寄雪夜書懷詩讀而有感因率成一章

韓 覲

涼風天上來吹閉萬民口膝六弄威權凍雲塞九有萬物息生機一望白千畝村氓埋頭  
居獵戶爲利藪藉此嚴寒時奮勇偕儕偶放縱任指揮無人掣其肘腰箭逐鹿麋趨兔  
鷹狗得者誇捷足失者呼負負狐狸忘歸途痛忍瘡痍走虎豹伏幽巖帖耳不敢吼毛血

散平原用力勝馮婦飽載聯轡歸言笑同沽酒或論某物佳或評某味厚既得未厭心巧計頻仰首怒作氣凌憎眼瞪大如斗亦惜太殺生只顧媚其友但恐物類空欲取徒垂手何當語獵人勿作刮地帚

雪夜分韻拈得巒韓官酸四字限半寸香成一律

王巽謙

西風吹作雪碎玉壓層巒柳絮詩吟謝藍關馬擁韓臥寒有高士耐冷是微官搔首望梁苑淒然忽鼻酸

重游千山龍泉寺

韓覲

超出塵寰眼界新同遊誰是會心人好山對面看無厭舊雨傾心話更真泉咽古溪沈亂葉松蟠危石蔭重茵那知立雪程門客仍是當年懶散身

前題步韻

韓濤

一番遊覽一番新入寺頻頻問故人過眼功名皆是幻賞心山水却還真狂歌松頂分濤韻醉臥花間藉草茵如此偷閒閒亦得白雲深處好棲身

前題步韻

王巽謙

山色迎來萬態新，龍泉重作浪遊人。  
俗還未脫心先靜，景不求多趣自真。  
松蓋擎雲蒼滿徑，梨花落雪白成茵。  
閒過禪院逢僧話，且覓仙緣寄此身。

遊中會寺中途即景

韓 觀

歷徧羣峰緩轡歸，馬馳鞭影趁斜暉。  
殘花無意隨泉落，野鳥忘機對客飛。  
風撼樹聲急雨至，路盤弓勢亂山圍。  
白雲深處菴三兩，怕惹遊人晝掩扉。

前題步韻

王巽謙

覽勝探奇未許歸，暢遊莫負好春暉。  
短坡放犢僧閑踱，空谷窺人鳥欲飛。  
嵐氣松風互激薄，山光雲影斂周圍。  
一鞭遙指峯迴處，綠樹紅桃白板扉。

登山遠眺

前 人

峭壁迎頭聳孤峯，過眼低鐘敲雲氣。  
合泉咽雨聲迷野草香，幽谷深林護淺溪。  
仙人臺上好登眺，恨無梯。

雨中自南泉菴歸再疊前韻

前人

歸來行得得忘却路高低洞口炊煙濕峰頭宿霧迷巖花開石罅春水漲山溪未足登臨興攀雲不用梯

和銳菴堂遊千山原韻

前人

宦轍曾爲萬里遊滇風黔雨任句留長安習氣難容足百粵名山歷到頭風景喚回桑梓夢年光銷盡水天秋千華眼底呈明秀踏雪探奇好結儔

又

韓觀

每憶千華仗臥遊他山他水懶淹留霜天夢繞三星洞月夜魂飛五佛頭蠟屐欲衝晴雪路詩情吟斷菊花秋奔馳又作南征雁涉獵春光讓舊儔

和韓叔侯遊千山原韻

昌黎舉人崔樹實子玉

天地一輪月古今萬種情羣山澹空雪深夜靜吟聲詎有遊仙夢而忘榮世名如何羊叔子獨立涕縱橫

西去一千里故鄉無此山近畿多世故逸客亦情關憶舊一回首幾人開笑顏愁深意自遠長嘯片雲還

明朝安可知當前休失之風雲靜遙夜天地證襟期孤月萬山影一杯千載詩却塵何處是想見葛天時

詠菊步銳菴堂謝餽菊原韻

王巽謙

密葉疎枝映畫堂臨風一笑洩秋光清姿尙帶霜前白正色曾分卷上黃不與陽春爭豔麗好從晚節作馨香籬邊埋沒君無恨傲骨嶙峋冠衆芳

又

韓 覲

秋花位置滿書堂燦爛儼同百寶光把盞酒思傾螳綠披霜衣記染鵝黃論交許訂忘年友傲俗還留晚節香高臥東籬甘隱逸不隨桃李鬪芬芳

又

韓 濤

坐對名花懶下堂園荒藉爾助秋光平分雲外殘霞紫好襯階前落葉黃立品全憑風骨

健餐英時覺齒牙香不妨舉世無青眼蘭杞叢生伴晚芳

又

韓伯文

護寒簾捲廠虛堂賞菊杯傾琥珀光對酒我拚千日醉迎霜花放九秋黃孤高遽醒繁華  
夢淡泊仍留翰墨香一自柴桑人去後與誰偕飲爲誰芳

時王和  
圃回泮

中秋對月

杜森

小集華堂客共哦濛濛香霧擁青娥有情照讀憐寒士不欲分光到綺羅風度千秋同性  
少詩篇萬古詠君多玄宗遊後無消息誰向蟾宮緩緩過

步韓叔侯偶成原韻

前人

彭澤閒居惟遣意士衡有志愛談文千篇坐詠傷心事一鶴孤鳴歎失羣荆樹再移枝怕  
損菑畬重闢力難勤春膠介後差堪幸身著萊衣曳杖耘  
持家少欲身常泰與世無求意亦恬誰惜鳳鸞束羽翼竟將騏驥負車鹽迴瀾始羨文心  
曲透紙方知筆力尖不學蘭成傷往事暢懷隨意韻頻拈



雨中憶晚香齋呈叔侯

王巽謙

未覩荊州又幾春園林氣色倍翻新交情依舊膠投漆世態從渠越視秦俸薄毛生虛捧檄初歸季子豈羞貧最憐華髮添衰鬢汗水盈盈隔尺鱗

和王和圃雨中憶晚香齋原韻

韓覲

僕僕風塵已十春驚人白髮鬢邊新無涯宦海須抽脚代覓桃源好避秦松菊尙存仍有伴詩書猶在不爲貧隨時有樂能安遇莫羨漁郎獲錦鱗

春日小園偶成

前人

數畝荒園是舊家柴籬繞宅路欹斜乍眠乍起風拖柳輕暖輕寒雨釀花小竹翠攢池角笋可離紅透土心芽生涯滿眼資澆灌日日呼童轉水車

溪山如畫望分明舍外酣遊當遠行芳草路滋連日雨杏花春放一天晴閉門早謝人求事曳杖閒聽鳥弄聲折取花枝瓶裏貯綠情紅意滿懷生

三月二日飲晚香齋醉歸感賦二首

王巽謙

茫茫世事總勞形華髮難留鏡裏青  
戀我愁魔疑歷劫傍人窮鬼竟通靈  
鼠牙穿穴亦刀劍魚目混珠終涓涇  
自笑生平少成就爲澆磊塊倒銀瓶

乘除物理本天然氣質由來到絕堅  
竹以凌霄方見節松能受雪自延年  
爭榮貢媚桃花笑照日隨風柳絮顛  
閱盡升沈完素好鉛華謝却且高眠

病中步崔伯賑呼愚無韻

韓玉綬

佩鈞

病近萱堂不敢呼牀頭日日睡如愚  
夢中不覺身微動老母低聲問愈無

和田峪給空紅風韻

性本癡愚腹又空無詩慙對落花紅  
武夫那解推敲事惟羨英雄歌大風

限飛肥衣韻

韓煥文

綬臣

帝鄉何處五雲飛故國尊鑪此際肥  
曾記夜涼談韻事不知花露滿朝衣

限童中蟲韻

韓玉書

仲麟

更闌酒盡懶呼童醉臥疎花冷露中  
欲覓好詩吟未就牆陰閒語早秋蟲

步崔伯賑自遣原韻

韓潮

不愛錢財不畏貧得閒莫負苦吟身  
放開心膽斯爲士豎起脊梁方算人  
憶子來時花滿院感君去後榻生塵  
世間多少陶情事何必孜孜訪隱淪

又

韓炳文子尉

貧入愁腸計亦貧紛紛俗慮擾吟身  
黃梁頓覺天涯夢白髮新生鏡裏人  
十載頭銜如敝屣卅年心血等飛塵  
者番曳杖歸來日且共陶潛作隱淪

又

韓煥文

初歸季子豈憂貧無奈閒愁累此身  
五載誰憐羈旅客卅年空作讀書人  
家徒四壁花爲屋徑賸三條甕有塵  
如此風光君莫笑一簑一笠釣清淪

又

韓玉綬

詩書潦倒不爲貧偏被離情累此身  
寂寞吟壇誰作主蕭閑酒社悄無人  
風翻菡萏爭拋水雨濕芭蕉細灑塵  
爭忍杏壇清訓到一篇多半話沈淪

崔飫侯自遣一首附

詩酒生涯莫療貧天公未許作閒身若論肝膽誰知已不皺眉頭是解人二十八年書浸淚一千里路骨生塵待從宦海歸來日便向仙源訪隱淪

書齋即景

時在城南陳家台

崔飫侯

齋前後數百步中皆茂林也窗戶間一碧無隙地短榻蕭然坐臥綠海中開軒縱目幾不知身從何處飛來口占五十六字惜不能狀其萬一

門前新漲接遙空萬木蕭森無徑通滿地雲陰晴帶雨垂檐夏果靜生風隣家雞犬疑天上半夜星河入夢中我到人間三十載者番纔住翠微宮

步前韻

昌黎田澍潤 略怡

高軒別去意園空夢訪君齋路偶通萬樹參天青欲雨一溪瀉月白生風人開窗臥星河裏犬傍籬眠花露中君在華胥逢我否我疑真到翠微宮

又

韓炳文

意園人去小亭空寂寂蒼苔曲徑通數樹鴉棲梧井月一籬蟲語豆花風憶從把酒開軒  
後常覺聯吟入夢中別去幾旬君記否桂輪香滿廣寒宮

又

韓煥文

碧天如水水浮空兩地心憑一紙通人去祇餘梧井月簾開時有豆花風崎嶇世路煙波  
外冷暖人情笑語中多少閑愁君莫問請看湖上梵王宮

又

韓玉綬

向晚濃陰接遠空電光閃閃迅雷通庭槐花冷清秋雨窗竹枝鳴午夜風刻意搜詩燈影  
裏快心說鬼漏聲中此間自有蕭閒趣不羨齊王設雪宮

大水  
前韻

韓玉書

無邊秋水接長空渾似江流九派通千丈烟飛三界兩萬山雲暗五更風波濤怒吼孤城  
外樓閣浮搖駭浪中安得潯陽犀甲弩狂瀾直射入蛟宮

中秋前夕雨中即景

韓玉珩  
楚南

小窗關未得風雨逼書堂  
鐙影淡將滅花枝寒不香  
煙凝茶竈白葉打竹籬黃  
坐待中秋到清鐘野寺涼

秋城晚眺

韓玉綬

人立夕陽城新詩處處生  
荒村四五點寒雁兩三聲  
水軟浮天動雲低帶樹行  
寺樓鐘遠起涼月照歸程

新秋夜坐

前人

鐙影昏昏酒一杯無端秋氣逼人來  
怪他四壁蟲聲苦月色西沈喚不回

除夕步友人索句原韻

前人

男兒伏處悵如何歲月空將醉裏過  
酒債未償詩債到算來詩債不爲多

除夕邀友人小酌

前人

三生結契夙爲緣折柬邀君餞臘天  
新釀雖非千日酒也能一醉到明年

哭伯容亡妻作

房毓琛  
仲南

憶綰荆釵二十年每經苦厄倍相憐屢調家計緣能忍力奉慈幃惕不光顧我真成一知

已嗟余只結半生緣囑卿料理窮泉事又恐相逢更音然

佛祖何心覺衆生難將遺事問卿卿在省理病一日思讀佛經余授以心經此身豈許菩提樹

歿夕室中忽聞異香聞者咸以爲異爾去休歸煩惱城剩有玉溪悲瑟柱劇憐徐淑解琴聲靈光繞頂誰曾見

壬午春夢青衣小兒告以頂上靈光將及三尺矣醒而告余以爲吉徵也噫孰知爲將天之兆乎贏得親隣哭盡情貧苦親鄰多有周恤以故弔者多哀

佛說諸因未造先鏡中花影諦真詮而今撒手塵凡事各自澄懷色相天慧劍一揮開髮

界伯容以同治甲子二月六日于歸洞房之夕余夢兩髮相結冥輪三返斷情緣在潘時八月初旬夢青衣老嫗乘藍輿

至髮未結爲一團牢固不開余持劍急欲斷之儼然而寤老嫗曰三迎則不可不往矣後遂不復夢迎乙亥夏月余夜坐南窗下爲講九

涕輒枕俯仰不已余爲能誦而每咎其多情輒曰余不知涕之從出但覺其可哀耳在潘時追談此事尙記誦等我癡魂將他罵作因緣總是他二語

秋柳錄九首

前人

春色憎人入畫樓啼鶯語燕總添愁憑誰喚醒封侯夢一夜西風誤白頭

湖亭深處有啼鶯猶記何戡唱渭城莫怨離人攀折苦驪歌初調最關情

弭繹臺上月華明往事催人白髮生苦恨當年臺下路一枝一葉總多情  
龍樓更點報黃昏太液池邊葬月魂莫怪寒鴉棲不穩御溝流水總難溫  
絮果萍因記不真漫天愁緒不饒人傷心自說非花樹怕道依樓一段春  
淡黃衫子忒風流一寸眉心最解愁我讀河東佳女傳半窗寒色到簾鉤  
泣雨吟風力不支秋痕逼入減容姿可憐白髮香山老猶有閒情賦折枝  
離情如草刈還生手挽殘枝記最清猶是去年攀折處緣何不見舊啼鶯  
明鏡團團似月圓比來郎面兩新鮮今朝秋色來雙鬢莫道王恭是少年

題畫作二首

前人

欹峯疊岑交松互陰古無人迹惟有鳥音  
翠巘點苔白雲護石雜以林樹與天同色

三月八日夢觀閣立本王會圖文皇中坐南向前列八國君長數十人珍禽異獸列  
於旁繪事如生因題長句一首比醒僅記海外會長四語



因足成之

前人

隋室鹿走羣雄馳中原擾割民病痍怨聲上訴真宰泣真人受命朝四夷丹青老手開畫  
本服裝詭怪匪夷思左樹羽仗右列貢揖跪拜立羅丹墀把卷細讀駭心目一一指點神  
忘疲海外酋長悉英主俊偉豪爽姿雄奇忽驚拍案叫奇絕日華星采天皇儀太原帝子  
龍鳳表虬鬚避走真可兒我讀此圖三太息安得及身今見之

馨蘭

前人

馨蘭懷故也仲南將有行倒筇檢衣愴然有懷援筆而詠以誌所哀  
有馨者蘭生彼空谷娟雨含風媚潛幽獨亭亭松栢以蔭以覆  
蘭之芳矣言采其香蘭之佩矣于彼纈囊及爾臭味差池無將  
在物爲鑑在體爲衣鑑知憂樂衣知瘠肥芳澤爾糝中情不違  
琴之清矣瑟之和矣翮乎舞矣慨乎歌矣云此靜好其無訛矣  
八月凝露九月肅霜鶉鳩鳴怨素華萎芳瞻言蘅芷饨兮鬱傷

駕言遠行寫我傷悲輪轂不轉哀哀馬嘶行矣不顧維以永思

過青石關

前人

昔聞父老言云此補天塹人力闢蠶叢坂峻馬蹏蹠驅車今過之所言殊不驗緬想千載  
前此地無破欠渾沌窳未鑿洪荒任昏墊峯毛森髮鬢巖石厲矛劍地方渾始完山氣秘  
乃歛一與人事接誅求累無厭髡山木無蘂鑿徑石不僭遂令幽邃窟路路任驅趨曲折  
數溪水湍瀉晴光澹垂柳雜文杏谿谷富華豔我行如浮雲夷險都不念亭亭日卓午策  
馬入茅店去歲頗歉收米艱酒不釀饑腸快得粟病膚喜受砭安得畢婚嫁幽棲免愁唵

絕句

前人

肥壤生瘠豆妍夫娶醜妻其事不可說亦不可議思  
一索即得男出自無意時事屬偶然耳不可屢得之  
人不愛其力地不愛其實剪棘生良材除莠育嘉稻  
神龍窟滄海猛虎步巖林男兒奮事業橫絕無古今

俚言

懶蛙蹲鯉背一躍龍門高雷雨燒鯉尾嗟爾蛙身焦  
跛鼈據困水縮頸呼兒曹架梁吾不與笑彼鼃鼃勞

田家曲三首

放下麻鞭仰面愁蒼天淋雨似淋油土頭格格犁頭鈍小革唔唔老革牟  
精肉切盤角豆長拌鹽瓜菜嫩生香撐腸一飽摩臍笑今日鋤完下甸荒  
連宵搓就火繩蒿着火薰烟意自豪薰殺蚊蟲容放脚倒頭一覺日輪高

前人

雜詩

前人

蝨腹常苦饑饑久亦不死一與人氣接率族燠以喜攢肌苦貪肉攻表兼及裏一飽諒已  
足胡乃不知止膨腹垢絮縫屨身爪牙齒我思蝨父言玄妙有殊理饕貪而忘戒嗟哉蝨  
而已

黃蜂裹香蕊兩股如松釵菁華擷百物亦往捐塵埃辛勤備旨蓄曰畏嚴霜來上以供君

相下以飽偶儕劫來誰家子勢取如凶災大蜂語喧怒小蜂聲鳴哀揮袖撲蜂死嘗此毒  
物材嗟蜂自護蜜夫豈蜂毒哉

鵲具拙醜姿網羅常弗及搶飛枋榆間飲啄以翔集隆冬雨雪多園囿少殘粒忍凍復苦  
饑儂闌色於邑一朝厭故形思欲變羽翼秋風海潮深潮退垢沫黑奮身辱泥塗輾轉豈  
自得欲奮不能飛化與水族習詎知豫且網相持日以急剜肉供庖厨難爲過河泣本宜  
守其愚胡乃投不測長呼鵲前來避網勿避弋禍患雖相當弋一而網十

物生冀人用見用物知喜違性而用物所往無一是虎豹非不威不可負耒耜蛟龍非不  
神不可步轍軌麴不可爲油豆不可爲醴救渴不舂糧救饑不汲水古聖叅天地盡物性  
而已

### 題畫

理舊篋故紙冗雜除之以火紙團牢固不易就燃擘視則舊時題畫作也往事如烟不  
復記憶矣感歎燼餘因錄存之嗟乎好花明月逝水流雲風景無多那堪回首

花開還幾時蜂蝶將人妒不恨春風來祇恨春風去  
春葉自迎風春花自當月佳人不在茲紅芳爲誰發

蒲桃酒

前人

甲申八月時內子養疴於瀋垣藥肆余戲釀蒲桃酒少許甘涼芳烈迥異凡品因記以  
詩檢舊笥廢紙錄而存之

紅殊<sup>珠</sup>入手驗朝驪火候頻看飯熟時記取腐陳麴蘖數一杯涼露沁心脾

寶劍行

前人

神龍陸離秋水明蓮鏢吐彩寒芒生英雄肝膽照千古紫光作作搖星精軒轅皇帝造五  
兵風胡歐冶傳其名天地精華一陶鑄世間萬事皆能平懸此可以了魑魅詎有鬼物來  
相爭昔年提入漢高手大澤蛇分泣鬼母三尺鋒稜削祖龍一條綉彩驅功狗九里光寒  
霸王身淮南血灑鯨王首顧盼山河風雨生指揮草澤龍蛇吼有時提向戰場間怒馬盤  
風雲氣勁白日綽色天綽容滿地頭顱旋風走未央置酒論功勳絳灌區區豈足友爾來

原书缺页

原书缺页

獅子回頭月牙井

潭形如月月如鉤搏兔雄心一旦收悟得皮毛原是假而今頑石也回頭

遊龍泉寺讀王瑤峰先生楹聯有感

雪泥鴻爪迹都陳悵望青山何處尋賴有蘭亭真面目問津莫許後來人

松柏偈

前人

無量觀上松柏侶根如生鐵柯如鋸不生不老不知幾千年丹砂服就如飛仙盤根之處無寸土此心似與石爭堅滋培灌溉全不用反笑凡卉爭瓦全矯揉造作適相害亦若杞柳爲搯椽相交自有本性在不支不蔓歷年年何論天荒與地老白雲深處獨流連

惜別

前人

客來春已去春去客茫然正好談心共誰教判袂先孤雲出岫懶老鶴破煙還恰有閒愁緒水流花謝天

書瑤溪先生草堂詩後

瀋陽翰林尚賢雅興



遼陽古襄平爲朝鮮故地自漢時已入中國郡多佳山水賢人輩出在漢則三龍五君皆儵然塵表有聞於時嗣是以來代不乏才美不勝書前朝爲巨鎮李成梁先後鎮者十七年爲最久國家發祥之始自撫順先入遼陽而後大今則合盛京十數縣遼爲大州山川人物甲乎一省地靈則人傑有由然矣余年二十餘爲諸生族叔有官斯土者以故數至郡得徧交郡之名士始識治瑤溪孝廉先生實居是郡之東二十里沙坨村又於先生姪爲金蘭交故悉其家世詳嘗造先生廬爲賦草堂詩以識其梗概其地枕山亘流匯太子河上游諸水至龍王廟北始折入河村外多楊柳春耕之時野犢息其陰山鳥鳴其上丁男作於前子婦餉於後平沙彌望淺草芊綿水色嵐光若近若遠時映於荊扉雞犬間山日既夕茅舍炊烟裊入雲際野老倚於門牧豎歌於道羊牛下來斯其時矣則一柴桑栗里也舍南草堂三椽足庇風雨先生弟樂山明經讀書處先生亦時課子弟其間堂外多花樹疏籬環市以代短垣南循林徑數里許一溪激石流湍其清若鏡方舟可涉產重脣魚味爲襄平最先生每客至命僕以魚叔取之以充饌

不減淝壚夜則鳥棲於樹犬吠不聞門外溪鳴如琴筑然清逾白晝蓋無人聲以雜之也時方夜半酒闌就榻月色半窗花影滿地清曠之樂以爲浮生得未曾有則又武陵桃源也先生爲滿洲富察氏大族定鼎初始駐防遼陽隸鑲黃旗先世多清德業耕讀至先生始以科第顯昆仲五序居四時年近五旬諸兄皆斑白友于如孩提太夫人年八十外猶逮養孫子輩數十日間安皆撫識非止頷而已先生雖貴布衣如寒素處家庭兄弟間一維謹尤得堂上歡性好施嘗調親舊急及里中貧乏時未有丈夫子撫諸姪如己出以故內外無間言居恒不出鄉里門嘗以姪罌誤奔馳遼瀋風雪中事得白而後已蓋平生除應試外未嘗輕至城市干公署登要人堂樂山性亦然其素履有如此者自同治甲子舉於鄉僅一試禮闈至是無意仕進課耕之餘惟以著書自樂雖不以文章爭而道逾重里有爭者得先生言無不解至婦孺亦耳先生名而服其教則居鄉之王彥方也先生精音律尤耽詩畫夫人爲省城西塔齊氏望族父以名進士出宰閨閣逸才淵源家學有管夫人風以下惟一小星布裙執爨暇則供筆硯役先生每經

史餘日畫竹樹數枚或弄琴一曲夫人亦時和之伉儷間如賓友則又舉案之孟光也先生嘗著閨中二十四小品詩屬余和之余心諾而力未能也今以爲愧予往青海之役行篋紀曰隴程吟草承先生賜序及詩予自甲戌通籍服官居京十餘年未歸里歲在丙戌夏有駐藏之命始請假東旋時以秋潦途梗改道航海匆匆過遼未及摠謁去年己丑先生姪孫雪橋秀才來詢悉先生晚年生珠方深欣幸今年春先生以資選國子監博士來都相見之際各增悲喜蓋距鄉舉幾二三十年矣予始謁先生年甫冠猶未婚茲已行年四十漸近知非親老家貧拙於祿養二女六男又皆穉幼半生心力銷磨於妻子仕宦之中歸田有夢買山無貲以視先生淡於名利出處從容爲何如耶上負國恩下負知己仰慚俯忤莫裨清時長安之居日困鹽米徒形役役回憶宿草堂時數杯村酒一枕溪聲胡可得耶胡可得耶予追維疇昔感念舊游或名動一時而弗克令終或財雄一鄉而未聞清譽或昔合而今離或此存而彼歿求如先生貧富不渝始終無替其處也不汲汲於功名其出也非矯矯於高尚則概乎未有聞始知安命樂天

達人高致非尋常仕宦中所敢企望已爲詩數章不盡萬一輒書卷尾以申倦倦儻獲先生不以爲陋辱而教之以救其愚而匡我未逮幸甚幸甚光緒十六年三月中浣世愚姪尙賢頓首拜稿

瑤溪世叔大人選官國子監博士恭紀

漢廷博士重經筵豈有人師但備員年到懸車才用世時方開榜正求賢固應幣聘來莘野終與風雲起渭川三老五更覘盛事先生清望講堂鱣

雙溪夾鏡萬山叢日在先生几席中栗里居鄰垂柳碧草堂春夢浣花紅蒼生霖雨思安石絳帳流風問馬融獨臥明時人不識神龍高隱漢遼東

一官寥落欲何歸升斗因循素願違脫屣從知酬世拙折腰轉恐向人非沙坨山色還如昨湖海風流近已稀終是清高甘隱臥凌霄不羨鳳鸞飛

在官猶是阮郎窮知己相逢一笑中祿說羊頭成博士金捐駿骨誤英雄青雲意氣功名老白首交情貧賤終休問苔岑同異處十年兩袖但清風

春風桃李鬪鮮妍恥與王盧判後前祭酒斯文誰掃地仲舒高策力回天備官國學三千  
選屏跡州城二十年聖世蒲輪今已逮如公殊不愧鄉賢

一官真與瘦羊同資格掄才漢道隆張李忘年聯舊雨游楊幾日坐春風科名白髮榮梁  
灝經濟青山起謝公多愧鹽車虛顧盼驂騮曾許冀羣空

聖明不許賦車懸真到看羊屬國年梁灝文章家起晚伏生經術老來便青雲久略朝官  
貴白首才登博士員七十科名終盛事龍頭合讓衆英先

讀書明道樂如何十上公車中乙科家有惠連春草賦堂開杜老浣花歌太平丹鳳時難  
隱空谷白駒禮重羅清夢沙垞吾亦戀買山無力恨蹉跎

有詩有酒有桑麻宜讀宜耕宜樹花豈屑雞羣爭鶩食偶思鱸膾着魚龍門前栗里千山  
疊村外蓄菑溪水一涯爲笑尋津劉子驥桃源虛訪避秦家

同舟郭李羨神仙太學經師海內先文采風流鄉里式家門清白子孫賢三龍孰愧功名  
早四皓終資羽翼全一下南州徐穉榻相逢悲喜問行年

清溪斜抱紫荊門曾到沙坵舊隱村  
泉石膏肓名士癖山林徵召聖朝恩  
傳家耕讀農桑譜壽世文章孝弟根  
料得微官留不住神龍誰測爪鱗痕

君身獨有骨如仙薄視名場捷足先  
詩史淵然宗武慧圖書左右細君賢  
據鞍顧盼蒼英匹杖國精神晚福全  
甲子何須誇絳縣喬松多壽不知年

千秋金鑑玉堂懸曾許終軍弱冠年  
一片鏤冰心皎皎五經充笥腹便便  
花催白髮春婆夢人老青雲子弟員  
此徑南山今古是名場捷足問誰先

追輓劉仙樵夫子

承德王乃新雪樵

誰與訂知音愴懷再鼓琴人天新恨集  
師弟舊情深有興詩同賞忘形酒滿斟  
祇今成逝水南望淚沾巾

襄平翹首望羈絆悵吟身路正無多遠  
情難一痛伸蘊懷仍幹濟未老斷根塵  
空復招魂切南天慘不春

已斷生前酒誰憐身後詩淪亡終古恨  
珍惜故人知

詩稿經馬西園付梓已告竣

集卷苦斟酌名山仰護持

九原定欣喜不負舊心期

憶昔趨承日人疑屬愛偏相看心最契息謗任無權誼重天能信情深鬼不憐九原容後會定結再生緣

近況擬寄馬西岡

前人

那復稱強健年光近六旬老無人欲殺病與鬼爲鄰形影困天阨語言留性真好憑殘喘在重結再生因

自憐齒加長頹廢可如何舊事說常復新書記每訛起居隨我便笑語厭人多難更中年好英雄氣不磨

甲子秋闈後作

朱集成詔九

槐花開罷桂花香兩度來觀上國光蕊榜姓名方待報棘闈辛苦已深嘗連朝客思添鄉思儘日詩狂雜酒狂敢向朱衣殫問訊科名曾否在文章

同治癸酉鄉試場畢出都車中口占

前人

車輕路熟出都中旌旆軒軒曉日紅痕帶半襟竹葉酒清餘兩袖桂花風盧君奪錦文章重司馬題橋意氣雄無限遙情何處寄雲霄千里數賓鴻

茅容殺鷄供母

前人

款客物疏厚母餐割雞供客善承歡小鮮可代姜魚獻一臠無煩凍雀彈莫道清貧難洗腆果然至孝出單寒茅公庸行真奇行青眼林宗早識韓

孟敏破甑不顧

前人

果斷方堪決大疑業爲破甑顧何裨情同玉斗撞拚碎質異金甌補已遲慧劍當胸憑斬截智珠在抱儘操持笑他瓦缶雷鳴輩臨事因循卒失宜

管幼安還山

前人

無心世事避徵求還向深山境轉幽割席自居明逸志得金欲拾鄙同儔情耽泉石同巖子躬出茅廬讓武侯富貴功名何足繫浮雲流水去悠悠

王彥方遺布

前人



休虞賞盜助狂梁匹布遺來羨彥方係纏相祈萌愧志質絲曾抱化蚩氓藐躬常服仁人  
賜游手權同善類彰得劍守來傳異日斯人豈必果無良

景  
光緒甲申夏初余主講復州橫山書院傍晚偕友人單陶菴散步南門外永豐寺即

永豐夕照鎮蒼煙

永豐夕照爲復州八景之一

斷碣殘碑數百年

碑多前明萬曆年號

古篆摩挲堪辨似高僧脫略不參

禪花知逐客含微笑室靜留人卻俗緣更有引人尋勝處石門緩步出南天

寺南有山口土人呼爲南天門

復州署內刑席沈禹丞因余贈腴寄詩鳴謝即步原韻以和

一識荊州面光風霽月中飲和容可掬得句律成功薇盥批吟久蘭馨吐囑同如脂君素  
薄願共勵虛衷

和復州稅務筆政德子賢原韻二首

前人

何須十萬貫纏腰北望襄平去思迢友聚德星連玉騎冬深積雪冷金貂

甲申冬月結伴北旋

心傾梁

子難因熱學愧元方敢自驕喜聽君詩咳唾雅鍼砭俗耳是英韶

自來清宦鶴兼琴恍住仙人世外岑道妙靜叅消俗慮茶香微漱沁詩心調高難和伯牙軫誼重休稱季子金三復佳章增健美只須島佛訂知音

光緒乙酉歲重陽前一日偕白璽廷往遊千山出遼陽南門即景

雨晴風定好天光命駕偕遊引興長沿路草鋪猶帶綠平林葉脫半飛黃山如有意迎人至雲本無心共雁翔此去快償登眺願况當明日是重陽

入千山

前人

游山積願已多年此日來遊意暢然饒有煙雲供點筆却無風雨阻吟鞭看松不斷沿途畔聞磬方知到寺前石磴巉巖真峻絕登高直上大羅天

是日先到無量觀登三十三天玉皇閣正值重九日

辛卯九日佐階潘邑侯偕友人劉芷沅黃渭卿及從余受業馬文隆馬文祐登高置酒於寶山精舍談讌竟日盡歡而歸換成俚句以志勝遊

前人

楓葉初紅菊蕊黃一年佳節是重陽天公意厚收風雨

是日天氣晴朗

地主情殷盛豆觴作賦無才

慚聖代

談次佐階與登高而未作賦之語

題糕有願等劉郎

有書啓劉芷沅在座

明秋此處如重會共舉英罇興倍長

行年五十偶吟

前人

行年五十春已屆知非歲清夜自捫心尙多疏檢制衾影非獨知指視嚴其際屋漏勿自欺  
嗽日中天麗四非箴豈忘三省心旋蔽往哲敢與期寸衷竊自勵人事有機緣何須使  
智慧雜誦齊人言待時與乘勢聞譽施於身衣何妨補綴道味本甚腴食休厭粗糲能忍  
心自安有容事乃濟血氣逞強梁盍觀鼻與拜既讀聖賢書功修有實詣學只在力行畢  
生惟勿替

光緒三十一年冬夜偶成

前人

冬夜睡復起一夜似兩夜勿任夢魂迷睡睡可稍歇

為貪戀紛華者下一鍼砭

次原武旅壁戴少甫高仲甫題句韻

袁鎮南保臣

自從捧檄久離家鴈影蕭蕭感棣華

時三四兄均逝

時事不妨焚諫草宦情空憶卜燈花回瀾決策

憑誰屬

鄭工決口  
尙未堵築

避債無臺竊自譁旅館飯餘閒放眼暗從春樹數棲鴉

戊子秋闈充內簾時襄校孫鐵珊孝先廣文以詩見贈因步韻奉酬

塵緣無分住蓬萊花滿河陽幾度栽不信劉蒼猶下第公久困棘園自慚苗振竟無才傾心甘作

風前拜老眼何曾霧裏開多少驪珠應探得這番賴有解人來

衡校迴環午夜深關防功令自森森好傳衣鉢班聯玉喜得文章地擲金問字交推經笥

腹象賢業慰廣文心公哲嗣已捷秋闈唱酬敢詡知音者百尺樓臺月未沈

赤倉道中

前人

東來春色徧郊原路近彝門車馬喧父老競迎新刺史河山猶認古梁園一官琴鶴饒清

夢兩度鴻識舊痕前曾兩任祥符屈指衙參應在邇好將民瘼達鈴轅

歷城感懷

前人

三十年來塵網中而今瀟洒出樊籠秋風禾黍傷周道晚景桑榆作寓公宦海回頭波浪

息明湖極目水天空琴尊自適何非禱福得失何須問塞翁

夷門話別舊同舟彈指光陰又到秋無補時艱甘伏驥自慚老大等浮鷗家書遠隔三千

里警報時聞十二州小住濟南無箇事歷亭鵲華任勾留

時事遷流等逝波神州何日靖干戈陶公三徑荒蕪甚謝傳傳中年感喟多塞外煙塵驅鐵

騎時蒙古獨立洛中荊棘困銅駝開洛陽兵變

大風猛士原難得安望人人曳落河

天津橋畔久聞鶻到眼滄桑已變遷伏莽依然如蟻聚守官安望有魚懸山中敢羨陶宏

景海上聊為魯仲連得賦遂初斯願足枕流漱石亦前緣

謁 孔林

前人

輕車經過泗湯湯遙望佳城氣鬱蒼松柏成行通輦路內有輦路碑蓬蒿滿目護宮牆泰山空仰

哲人萎洙水環流教澤長洙水在墓門南三橋遙接坊曰洙水橋蒼草至今靈異著年年茁秀墓門旁

謁 孔廟

前人

玉振金聲闢禮門廟堂赫濯古今存冕旒共懷當王貴鐘簾空懷大祀尊時廢丁祭歷代豐碑

銘盛德一株老檜託靈根杏壇舊址猶無恙馨欵如聞至聖言在廟內係舉人手植杏壇亦在殿前

過唐秦叔寶故宅地名五龍潭

前人

閒步西城訪逸聞徘徊醫院夕陽曛

此地現為醫院

潭深疑有神龍護

潭水甚大源流不絕

人去空留汗馬勳故

土已非唐社稷殘碑猶說左將軍

院內有碑上刻唐左武衛將軍故宅

英雄第宅今安在古樹寒鴉鎖暮雲

### 光州署內樂育園古風

前人

我家結廬華表岑

余村南之山綿亙數十里俗稱華表山即丁令威化鶴歸來處

林巒蒼鬱深復深舊有小園拓數畝栽花種竹愜

胸襟自從挾策遊京洛鉛刀欲試驚錯愕朝朝曳裾侯王門不近山林近城郭遂使家山

三經荒梨桃榆柳自成行花開花謝無人問乳燕鳴鳩春晝長人生宦遊原無定空談經

濟名難稱何如隨遇騁素懷軒冕勿忘泉石興今我捧檄來光黃下車棟椽簿書忙愧無

半千文雅澤敢云臥治學淮陽賴有園林多逸趣蒼松翠竹濃陰護池深三尺泳游鱗樹

高十丈引翔鷺松關掩映覆藤蘿鬱林奇石列嵯峨山館紆青微雨後

園有雨青山館思近軒健松亭諸勝

軒亭

凝碧晚風過公餘把酒招客至一舉十觴莫辭醉醉酣搔首斫地歌光陰過客祇如寄君

不見蘭亭梓澤盡邱墟富貴浮雲身外事

晤繆東麟潤紱太史有感而作

前人

憶昔與君友君年十七齡聰慧由天悟玉立何亭亭萬言倚馬待奇意發新硯愧我樗櫟  
資謬託芝蘭馨君家近南郭出門即郊坰昕夕時過往風雨契晦暝倏忽浮雲散汎汎水  
上萍人生各有志咸奮摩雲翎乘時攄懷抱振袂出闕廷我爲大梁客君覽泰岱青僕僕  
風塵吏案牘勞其形思君不得見悵望榛與荅豈意煙霾起鼓鞳走雷霆四海無淨土城  
郭有餘腥周鼎既已矣呼籲天無靈驅車來歷下重上君之庭睽違四十載幸未蒲柳零  
把晤道契闊落落數晨星引我看園圃瀉玉泉清泠薜蘿覆東壁蕉竹陰疏櫺吟詩唾珠  
玉留客傾綠醕酒既令人醉詩復動人聽長歌遂初賦時讀內景經公精岐黃 達人有獨樂迫  
我憶雲停

邯鄲謁盧生祠二首

前人

名韁牽惹逐風塵過眼雲泥似轉輪豈獨浮生皆幻境神仙猶是夢中人  
堪羨先生亦慕名封侯猶是熱中情吾今策馬邯鄲道縱有黃梁夢未成

銅雀臺

前人

竭盡脂膏築雀臺空片瓦沒荒苔至今依舊漳河水無復當年橫槩來

疑塚

前人

枯骨無端巧護持纍纍千載尙傳疑生前不與爭雄長荒塚何須怕世知

內鄉早發

前人

一夜不成寐朝驅七里河泥深龜尾曳石碎馬蹏磨問俗停車待憂時拔劍過此行原不負山水助吟哦

內邱店內見金筑醉蜚生題壁各詩戲成三絕

前人

靜好誰無伉儷歡驪歌那管別離難勸君莫灑相思淚留向陔南賦采蘭  
滿壁纏綿絕妙辭愛君麗句惜君癡也知孔聖曾垂訓三戒原來首少時  
鸞鳳新諧眷戀深鍾情莫漫負初心須知樂府相思曲不及當年白髮吟

自遣

劉沛霖  
雨村

浮生切莫論枯榮滄海桑田轉眼更有酒不妨終日醉無官真覺一身輕獨愁詩少唐人



筆敢望名高漢代英  
閒與兒童消永晝  
手敲棋子弄棋枰  
結廬溪上數椽橫  
小坐時聞流水聲  
蕉葉學書文字綠  
松陰高臥夢魂清  
曾留竹徑因風掃  
不捲簾藥待月明  
免俗未能聊復爾  
詩瓢酒盃過餘生

秋溪曉立

前人

秋來早起愛臨淵  
小立身披兩岸烟  
曉氣迷將溪上地  
清光透出水中天  
涼餘浦口魚猶靜  
寒鎖磯頭鷺尙眠  
山色淡痕無限綠  
一聲欸乃發漁船

上金老夫子子青

前人

我非常日侯師聖  
一見濂溪便不同  
言下有如撥曉霧  
邇來始覺坐春風  
執經忝附羣才後  
課藝管居厚望中  
鶴到人前偏不舞  
至今依舊累羊公

登魁星樓

前人

行人到此豁雙眸  
任許閑憑百尺樓  
新雨窗間山遠對  
夕陽城下水長流  
一年春色容巢燕  
萬丈文光接斗牛  
自有雲梯能接引  
終須次第占黿頭

題孔有德墓墓在城東南花園村

前人

無端人馬走淄川  
奔往他鄉各一天  
挾衆不思承盛業  
誤公都爲握兵權  
當年劍佩歸黃土  
此日松楸鎖綠煙  
寒食清明空過了  
半盂麥飯望誰憐

初入聖水寺

前人

四圍山色被雲屯  
爲覓林泉不憚煩  
隔嶺松濤先入聽  
滿溪桃浪竟無言  
來從谷口通樵徑  
轉過峯頭見寺門  
定與老僧分半榻  
禪牀坐愛月黃昏

龍泉在十山龍泉寺

前人

百尺龍泉不散殊  
直通一綫入香厨  
想因龍腹能容納  
信口噴來供所需

八步緊千山無量觀有八步緊一步登天石崖絕險

前人

絕頂苔青路未封  
過來人已早留蹤  
要知喫緊爲人處  
一步何曾放得鬆

巖陵釣臺

前人

烟水茫茫勢半開  
巖陵七里古灘洄  
可憐光武爲皇帝  
不及先生有釣臺

題馬嵬驛

長生殿上說風流記得當年笑女牛掩面辭塵今已矣問他還認義兒不

又詠馬嵬驛

騷壇反正入吟哦只爲楊妃立議多遂使宮中一女子千秋獨據馬嵬坡

銅雀臺

一世英雄安在哉空留瓦礫沒蒿萊僅傳寶履分香事尙說當年銅雀臺

蠶婦吟二十首錄四

清明蠶事正堪祈擊鼓聲中默祝時甚幸家無游蕩子春來便要賣新絲  
朝來行入綠陰中歸向窗前置竹籠直待阿儂梳洗畢養蠶最怕首如蓬  
宅畔桑陰五畝多柔枝低處手輕拖可憐終歲勤蠶事徧體何曾着綺羅  
始於郊外祈蠶日終薦千端幣在庭此是儂家應有事聖朝寫去作丹青

懷人四十首錄四

前人

前人

前人

前人

前人

一別陪京兩地春此心又覺蔽紅塵望風懷想還相問何故西方多美人

徐松軒 胡錫九 王谷香 徐東川

二百人中領冠軍儼然一鶴立雞羣也曾杯酒從君索客爲同期賦采芹

袁保臣

銀鈎鐵畫最分明一紙珍藏重感情聞道近來拈筆處率更書法易真卿

毓朗川

猶憶光從上國觀春風鞍馬走長安郊祁並美尋常事也許臨風說二難

張衡三 鵬三

讀方孝孺傳

前人

大書篡國賊一幅黃麻紙刀頭有善終但看因誰死

咏蟹嘲世

前人

爾亦能文者居然八股成憑將二甲第天下任橫行

新泰雜詠四首

奎 光竹泉

堂階森列古槐風遵例排衙曉日紅流水一官稱父母民依時繫簿書中

早衙

青衫薄宦客爲家往事低徊感鬢華那若空靈老槐樹常留餘蔭護官衙

感懷

新政條分次第施代宣德意俾週知虛堂一念通民隱不取窮簷汗血資

勸捐

結成廣廈集羣才珠樹亭亭著意栽延訂皋比宏教育淵源還自六經來

講學

### 附新泰雜詠自記

余歷新泰縣任已九越月矣政拙才疏夙不習吟咏會瓜代及期行將解組偶得俚句以自抒懷抱非敢言詩用博方家一笑耳頃以儒學老友艾單兩先生品端學粹公餘過從每談輒忘倦辱承不棄迺步原韻而和以詩厥後和者如林洵極一時之盛曠落

落塵寰其必有以知我者乎茲錄

拜章

兩兄大著藉以雕飾老朽刻劃飛鹽使婆娑老

樹又添出無限生機喜可知己其繼兩學而起者或學校名流或山林隱逸揚芬清藻情見乎詞祇以行色怱怱未及併錄金璧敬彙原稿付諸錦囊俟居閒無事再向自己身心一一體驗竊恐今是昨非不免怱然慚而爽然失矣雖然匹馬秋風前途尙遠借此詩箋用作他山之攻錯亦晚年人進德修業一大快事爾時在丙午夏六月

### 過額侯故里

宋玉奎

星五

侯烏喇人仁宗朝以經略平教匪五世孫榮全襲爵官伊犂將軍能繼其武余昔歲過

其故里感而賦此

千章喬木鬱蕪蕪老將朱軒世有功淨掃欃槍江漢外獨高閎閱薊遼東空庭徧轟雲臺  
仗宿鳥猶驚霹靂弓嶽降崧生尹吉甫可留遺裔鞏岐豐

王氣千秋已黯然尙留條絳說前賢威聲踔厲天山北先代弓裘漢水前鐵券常銘新帶  
礪朱門猶煥舊雲煙中興人物諸侯表共憶還鄉過沛年

遼城出走

甲辰日俄之戰

前人

聽斷荒雞欲五更圍城一去夢魂驚三山風送魚龍氣九塞秋高虎豹聲自古關河元有  
主據憐蠻觸苦尋盟蒼茫四顧遼東路更向何人訴不平

遼東懷古四首

千里雄封渤海濱東丹饒有好丰神頭鷺宴罷春如海射鹿圖成夜向晨

東丹王有射鹿圖見阮亭集

鴨綠

新收江上部醫閭遙轟國西隣

閩山有人皇墓

自從移向中原去更有東樓幾故人

風雲蒼莽古城隈誰識當年闢草萊萬里青州輸禹貢一灣遼水自秦開黃龍北鎖重關

險赤帝東從小沛來笑爾城門樓上路督師畢竟是凡才

明督師袁應泰佩印  
城樓上縱火自焚死

高皇親部五侯兵遙指秦關路幾程四鎮旌旗摧節度一家兄弟盡韓彭龍騰大漠寒無影馬踏長河夜有聲聞說羽旄飛降日香花夾道滿春城

五色雲車出建章九年大統集文皇雄師兩駕中原地開國三封異姓王韃靼知亡歸玉璽朝鮮拜命鞏金湯請看午夜郊天處十丈高樓轟鳳凰

### 長白山

前人

長白崑崙只一峯龍蟠虎踞競神功高撐遼海重關外俯視辰韓一點中五岳齊尊連極北三江分派入天東艱難王業由天作一樣雄圖話古公

### 甲午秋闈報罷聞東警作

前人

幾道旄麾古戍樓九連城上緊防秋鯨鯢遠落青溟外士馬新來黑水頭初日扶搖三小島將星熠燿五諸侯何時渤海降書到王會依然遍九州

成濬堪云似劍  
南學杜之作

### 記事五首

庚子

前人

都護何人握重兵百年坐鎮此神京  
狼烽數警遼東郡驛使新歸右北平  
何事陰符尊赤帝竟從前席誤蒼生  
杞人多抱憂天想忍見銅駝萬古情

彪狐驀地起陂陁莽莽中原喚奈何  
臥榻久矧他族睡說盟競唱大巫歌  
元黃戰飽羣龍血玳瑁梁空海燕窠  
惆悵路旁奔命侶長安道遠虎狼多

昨聞蠟報出關中極北烽烟徹夜紅  
百尺樓船空海淀九天仙仗已崆峒  
山前幸少周王禍沛上誰賡漢祖風  
戎馬艱難臣子分敢將麥飯望羣公

急風驟雨逼黃昏有客悲歌出郭門  
遠向江波憂帝子可憐寶玦泣王孫  
憑河留守今何處復楚包胥欲斷魂  
回首鳳凰樓外路羌胡塞馬恐成屯

絕塞飄零望帝鄉喧傳十道欲勤王  
秋高大饗千夫長河廣爭飛一葦航  
馬首東回穆天子虎賁西上郭汾陽  
杜陵有句君須記後漢今周喜再昌

成滄堪云五首深得詠懷諸將之意與少陵嗣響也

### 白塔寺二首

在遼陽城西七隅分前後二寺古塔矗立其間爲隋唐舊蹟有古井一僧人汲以造糖所謂塔糖是也今入租界矣

前人

古井何時鎖碧苔半城殘雨寺門開  
三千法象諸天散五百童男跨海來  
行脚已無乾淨



土登臨空憶妙高臺憑欄不覺奇懷減一舞銅琶首重回  
雄關左輔古襄平羣道浮圖接上清假道不曾來璧馬空堂奚自穴齷齪金經冷落唐三  
藏珠賦銷沈漢兩京欲向老僧談往事斜陽無限賣錫聲

長春懷古

前人

一綫鴻溝萬馬營金遼人代幾紛更殘碑猶有黃龍字古道遙通鐵鳳城碧眼賈胡爭互  
市南冠偕楚尙稱兵秋風多少歸來想儘在鱸魚蓴菜羹

贈別

前人

快履輕衫笑爾曹連城聲價自來高鵬搏大澗盤孤影鶴唳天風下九臯正是東都新歲  
月也從西蜀盼櫻桃臨歧攜手無多贈幾縷心情一寶刀

山海關

遼東懷古之五

前人

秦軍四道出關西遼海燕山路轉迷帝子但憑三尺劍降王終啓一丸泥春郊千里雲霓  
望夜月重城虎豹啼耀德何曾專設險殺繩終古草萋萋

成澹堪云  
積健爲雄

船廠

前人

松花江上六龍游古鎮橫盤永吉州三戰扈倫空四部一山長白衛千秋南交屢却明珠  
貢東海猶通下瀨舟城郭滄桑俄頃事暮烟高鎖太清樓

烏喇懷古

前人

太息金遼歷數更一灣流水抱荒城長途盼斷明駝使古戍曾屯細柳營王祭包茅誰縮  
酒故宮禾黍客吞聲當年闕輔三千里誰似斟鄩土一成

將軍墳

將軍傅察氏名穆克登康熙朝與朝鮮界立  
華夏金湯崗山河帶礪長十柱於長白之東

前人

嗟爾將軍舊賜瑩當年八表愴威棱松根轟起連錢馬天際橫盤帶角鷹一代勛名標石  
柱千秋帶礪誓金滕我來別有興亡感風雨蕭蕭話二陵

贈世仁甫宮詹

前人

頑石何年證夙因窮廬愁我苦吟身忽逢栗里門前客偏是靈光殿裏人兩字頭銜書菊  
隱一腔心事問靈均冠裳俎豆銷沈後誰識先朝侍從臣

閱談飽帆詩鐘卷子並感其當年臥薪代父事因有是作

久滯周南太史談卅年聲價滿長安屬文不炬三條燭代父曾披一寸丹朔漢功名歸計  
吏東山絲竹早辭官新詩有句誰能識破篋猶存供奉冠

張君仙舫

二十年舊交乙卯春正月忽以詩稿餉我喜題其後

壬子秋詩鐘圖題戲猴太史有破篋猶存供奉冠之句爲全卷所無

鎮日眉峯鎖不開持書忽報僕夫回詩隨天上卿雲到人是樽前舊雨來春日魂銷南浦

水秋風獵盡北山萊羨君一種生花筆玉局千秋是辯才

澹盦夜話憶潔珊却寄

前人

想到乘楂萬里行悠悠江水可勝情世途未歷風波險黨禍誰知洛蜀爭我不病狂奚嗜  
酒君多奇癖是談兵漢興已久朝綱定愧殺癡頑魯兩生

烏喇古臺

綬人

荒臺百尺勢凌空嗟爾遼人不世雄故俗千年猶尙左大江百折竟流東海蘭甸遠微茫  
裏木葉山高想像中帝子不須還悵望沛都久歇漢王風

成云氣

象青萍

東丹王故宮懷古

志稱在遼陽城東北隅宮北有讓國皇帝御容殿今已夷矣金銀庫馬神廟是也

鳳翥鸞翔拱上京人皇建國此東平風高華夏三千里水走全遼百二城三讓頻煩天下計十年辛苦汴中行朝周玉馬殷王子孰似西樓遜國名

葉赫懷古

前人

嚴關西指路迢遙草昧初開尙武朝四部風雲摧朔漠兩河丁壯下全遼淒涼戰蹟孤山壘撩亂邊愁萬柳條昏媾寇讎兩消歇那堪往事問寒樵

馬西岡先生家藏昭君出塞長卷識者謂爲昭君眞面目余固未之敢信也感賦五絕句

前人

馬上琵琶適異鄉滿身渾帶雁門霜胡兒不解離悰苦緊逐香塵趁夕陽  
侍女如花翠滿頭強將羅縠換貂裘呼韓已老中行死請釋君王北顧憂  
丹青一誤妾心驚誰信人間善寫生兩字妍媸雙血淚漢家天子最分明  
回首南雲不敢噴幾年辜負報恩身君王莫怨毛延壽記否烏孫下嫁人

囑付深宮絕代姿自家顏色自家知他年再有承明奉莫恃門前劣畫師

自奉日醫院還家養病作

王化春

雨帆

徧觀色色與形形呆相無由着性靈卅載勞神徒自擾一番快事未曾經飽嘗世態知榮辱敢向人羣判渭涇愧乏片長身且病頭顱贏得此星星

東征

仿少陵北征九古

前人

壯士將東征辭家此遠適自古征戰苦父母失魂魄兄弟亦悲傷千里悵行役妻孥亦含愁凝眸送郊陌野築思子臺山名望夫石此去何時還兩地情脈脈誰非帝世民悉作戰場客軍書催急行束裝離田宅蕭蕭征馬嘶人盡驅鞭策前驅排大旗後隊執長戟朝發丹鳳城暮宿黃龍驛四顧浩無垠萬里荒沙白颯颯邊風寒寥寥胡天碧古戍殘花開野路雜松栢獸鋌羣俱失鳥飛亦停翮昏黑天無曛鬼哭狐成羣愁魂與衰草團作荒山雲所遇皆慘淡雁聲不堪聞草際燒癩黑知經獵火焚回首家山遠蒼茫隔塵氛陟屺淚如雨違親爲報君敢愛馳驅力而勿矢忠勤立功在異域孰是霍將軍又如寶車騎高風曾

紀勛又如傅修期捷報露布文我輩樗櫟材敢不矢慙懃跋涉詎辭勞奔走供馳逐忽驚時物非始知秋光肅時亦過瓜期猶未言旋復河路指葫蘆烽烟望苜蓿邊地多苦寒冷逼征人服蕭條古戰場天陰鬼常哭積雪深沒脛驚沙時入目強胡來挑戰平陵相殺戮兩軍方合圍谷口精兵伏橫截取輜重戰士心膽縮屍填巨港岸血滿荒山谷天地本好生奈何戕化育古者守四夷四海慶雍睦誰能平胡虜威名懷李牧

步胡孝廉星階旅夜有懷原韻

丙辰

張斗垣

星南

掃却新愁與舊愁纔過炎夏又迎秋驚心時代遷流易照眼繁華次第收一世不移柳下介十年常抱杞人憂讀君詩罷增三歎當作蒙莊物外遊  
中華轉瞬五經秋科第升遷付水流立說誰崇夫子履乞榮爭賂吉光裘劇憐美玉終藏櫝不信香蘭竟蔽蕝爲問於今皇路上幾人學品似君優  
孔門慎重在行藏載贄於今未是忙百二河山頻屈指五千書卷獨撐腸無柯縱使權難假不竇終須行自方却喜象占曾有得觸藩惟恐誤羝羊

丹桂黃花早歲成誰言佔畢誤平生貧如原憲猶非病高似陶潛不在名天地無私真逆旅宇衡相望最關情邇來多少要津慕泉水依山幸自清

張子遷以所作七律書贈條幅即步原韻

前人

寄寫谿藤未敢忘功磨鐵硯宛如桑譽叨嘉樹時滋愧語似幽蘭味愈香縱使頻年常契闊已知老筆不類唐邇來更約同懷客導引雲梯望帝鄉

再步原韻送子遷赴都引見

前人

遠大前程莫淡忘今秋况值稔農桑此行朵殿絲綸美而後琴堂姓字香家有傳人誇鄧禹年非老景異馮唐他時日下言旋後願賜佳音到我鄉

病痢見痊答高葆忱

四首錄二

前人

半世旋叨盛譽馳故人書札寄時時家聲敢附留侯望詩學深慚杜老詞交已忘年三友益亂猶播韻兩人癡從今爨響焦桐聽不必心傷莫我知

來詩曾謂契苔岑事事相關印此心酬和有情交太晚別離未久恨偏深長虹已吐囊中

劍流水欣逢海上琴我亦思君今更甚如何衰病苦相侵

山海關姜女

前人

當年哭泣歷霜風身自西來命盡東

世傳姜女為陝西人

留得人知節義此祠應與海山同

御題詩句已秋風直表姜祠在朔東知與杞妻成二十事至今婦女口碑同

祠內有碑亦以杞梁作疑似之詞故

高宗詩謂訛傳意亦以姜女為實有其人矣况杞梁妻沈瀾水即有廟亦不應在此近閱廣輿記諸書云關外小石上有婦人足跡即秦時孟姜女尋夫處乃知姜女與杞妻自二人也而婦孺以為一人云

答日本軍官某少將

趙光普 治臣

自古脣亡齒亦寒天邦安即日邦安願為兄弟敦和好莫逞機謀啓釁端異服異言雖有別同文同種忍相殘亞洲牛耳終須執姑作臨時壁上觀

蛤溪邊生遣人來要柳枝以便栽植得詩五首特寄之

嫩條得地條成陰此種原來未易尋早晚栽培須努力願君休負故人心  
環村綠柳盡杈榦謬說垂楊到處斜今日得來真種子蛤溪春色屬君家  
酌地殷勤告柳神折枝端為付詩人明年雪盡冰消裏向蛤溪邊早送春



佳種從來秘玉金，蛤溪移去爲知音。隋家隄上根株異，陶令門前歲月深。微物亦云真，得地柔條但願早成陰。主人愛爾情偏重，勿負栽培一片心。

今告爾柳神臨別酌，汝酒我有慰藉言。爾柳能知否，昔年與余居依依。雖已久，余性既疏懶，童僕又非有培植。總無人幾乎未成朽，爾今到蛤溪樂土，真無偶植之藥圃。前迄及萱堂後攀折無征夫，灌溉有園叟。况復新主人素著生春手，愛花情既深。種樹澤更厚，定能護惜殷。肯令折磨受行得，大椿齡不數喬松壽去矣。得所哉，何必戀故友。

銅花瓶銘

前人

維花有瓶曰取其久，維瓶以方曰取其守。質以銅成形，鑒不朽。養此心香，遠彼塵垢。俗士所無，雅士所有。曰供玩觀，唯唯否否。

遣興

前人

何事風流富貴誇，數椽茅屋足爲家常儲。詩稿常儲酒半種，桑田半種花有客。拙妻能進饌，無僮稚子解烹茶。此間高臥羲皇侶，與世無求養歲華。

壽王益芝八十迎壽詩八十韻

韓玉書仲麟

渭水投竿日汾陽賜爵年初春迎大耋往事溯前緣渤海家聲遠瑯琊世譜延蘭亭香鷲  
護奎壁福星聯育德根誠樸生涯善懋遷持躬偏自儉施惠每爭先陋室貧常卹災區賑  
屢捐守中銅砥柱禦外鐵關鍵兵燹驚衢巷商情懼市塵挺身抒抗論放膽展言詮利市  
伸公議成城倡義捐豪強威不屈窮困曲爲憐萬斛純仁麥扁舟少伯船深恩周里黨高  
誼仰雲天乃父開鴻業生兒亦象賢詞先分豕亥字早辨烏焉賦性原如鑑潛修更勉旃  
垂髫書力讀弱冠史精研燕許經綸手郊祁綺麗篇風流標奪錦瀟灑筆如椽視膳春朝  
起承歡夜晏眠雁行飄紫綬鸚薦出青氈仁厚麟翔趾才華鳳集肩一方膺巨篆百里著  
先鞭愛溥棠留舍爭消芋訟田養餘中士俸廉飲上流泉謹慎冰壺潔清勤玉礪湔心惟  
雁翼翼膺每服拳拳去莠刪叢弊除奸戒一錢節高胸有竹花判舌生蓮負米情雖切鳴  
琴治疊連簿書勞校閱警令布旬宣寬猛籌兼濟軍民策兩全颺風馳日電隱患弭烽煙  
虓虎耽耽視炎湯沸沸煎束薪抽釜底烈燄撲眉巔遠志何由達當歸意獨專白駒苗藿

繫黃鳥榭桑旋山斗仍金縣林園樂輞川庭趨承鯉訓燭照洞犀然豹隱文尤煥鸞棲爪  
暫蹇賦閒甘驥伏得勢起飛鳶去覺朝敵遠來如皓月圓理財勤左藏廣譽播東偏珍重  
培邦本隄防溢利權捐徵嚴比較銀穀杜牽纏克已防纖芥歸公賴滴涓需充寶庫國  
脈活珠淵吏剔蝻螟蠹埔無雀鼠穿枝榮由本固木正藉繩愆大律鳴鐘鼓和聲叶管絃  
徽音評月旦名字重幽燕魑魅終驅逐神龍信蜿蜒孝思心印鑄輿誦口碑鐫塵誨無言  
喻笙詩譜韻編箕裘繩祖武禮樂紹家傳養志親心慰柔聲敬意虔雅懷耽翰墨方術謝  
丹鉛陸橘懷襟底萊衣戲膝前朱顏翁矍鑠白髮鶴褊褊火煖爐冬熾風清枕夏扇卿雲  
欣有兆福海慶無邊松栢精神爽岡陵氣骨堅眼前春九十額外祿三千鄒邑思追孟彭  
齡欲及籛優游閒几杖緩急向韋絃歡喜諸天佛逍遙大地仙吹幽齊奏曲頌魯各騰箋  
鐘鼎笙歌富文章藻彩鮮德尊身自泰行健體占乾嘏祝長庚酒賢稱閔子騫大星南極  
照明鏡北堂懸俾爾耆而艾其人美且鬖衣冠都聚會車馬更喧填兕任羣英獻羊憑賀  
使牽趨承忙履烏踰濟雜釵鈿吉卜雙魚洗祥徵五鹿磚貽謀垂燕翼肇歲指龍躔遙拜

生辰壽重開上已筵靈椿敷庇蔭萬代永絲絲

七律連環體五首

前人

樓臺天半起笙歌高會羣仙慶大羅玉掖金門絃管脆珠簾畫棟笑聲和飛霜舞袖來青女對月彈箏憶素娥更有壽星騎鶴至蘭亭醉酒祝三多

蘭亭醉酒祝三多南極仙翁拄杖過養志每懷尋乳鹿學書偏愛換經鵝鸞笙雲外風搖曳蠟炬庭中影蕩磨無字傳聲詩有力期頤消遣樂如何

期頤消遣樂如何絃管東山太傅歌雲表鶴籌添海屋日邊鳳祝嘯卷阿竹竿罷釣熊飛渭銅柱標名馬伏波大耋華年春酒獻東風含笑醉顏酡

東風含笑醉顏酡雪嚼梅花細咏哦齒德天然真善果徽章人反羨嘉禾南陔風骨思純孝大雅雍容養太和怪得詩人皆詠壽老泉有子是東坡

老泉有子是東坡咳唾珠璣凍筆呵酒釀綠雲酣竹葉茶烹春雨獻松蘿臥來冰上魚求鯉觀到棋邊斧爛柯今日神仙齊祝壽樓臺天半起笙歌

張有楓見和連環詩疊前韻奉酬

前人

陽春白雪和高歌錦字迴文換綺羅道德千言神朗照家風百忍氣雍和碧紗舊句唐詩  
聖黃絹新詞漢孝娥奪幟吟壇牛耳執堂堂旗鼓信君多

堂堂旗鼓信君多問字敲詩且夕過雅調高鳴雲表鶴清標初浴水邊鵝孤鐙夜雨奇書  
讀老屋秋風利劍磨咄咄逼人悲世態問天搔首奈愁何

問天搔首奈愁何煮字療飢我作歌記得開樽學北海也曾奉檄赴東阿朱顏彫落窮途  
淚白首銷沈宦海波籬下新分陶令菊一杯亦醉酒痕醅

一杯亦醉酒痕醅且對秋花細咏哦昨夜白霜涼寒草連村紅稻納新禾鏡中寒士愁顏  
瘦野外農家笑語和自悔讀書諳世味不如田父樂秋坡

不如田父樂秋坡呼負冬窗凍筆呵春夢一場空歲月清霜兩鬢老煙蘿依然故我詩存  
稿那得深山斧爛柯正氣堂堂子張子陽春白雪和高歌

按此五詩凡四疊韻餘不備錄

雪夜無聊

前人

冰濤寒湧古遼河風捲銀沙灑旋渦密葉壓低殘葦岸香苞肥釀老梅窩瑤池龍鬪飛鱗  
甲琪樹花飄鬧蝶蛾閱盡繁華歸儉素青山許我共頭皤  
纖塵不染舞婆娑立品清高可信他古道平鋪白地闊凍雲低壓碧天矧圍鑪夜酌思良  
友擁被敲詩遣睡魔萬里江山皆失色扁舟獨釣有漁蓑

和

張友楓病後感懷  
修達三瑞雪豐年

首二

前人

新詩同咏舞僂僂兩樣情懷善揣摩飛絮有徵期樂歲採薪無恙起沉疴倉箱預卜田多  
稼子女騰歡賦不苛壽考豐年天付定從今前路豈蹉跎  
富貴由來一刹那歉豐亦是疾如梭穫收禾稻三千頃驅遣寒灾十二儺春日思耕勤卻  
冀秋風健飯飽廉頗兩階干羽從今舞化格苗民共島倭

分韻題三首

前人

素好高歌效楚狂恰來佳咏賜琳琅逢場作戲心先喜得句將書意轉傷伏櫪自悲加齒

馬觸藩人笑硬頭羊開簾望遠聞征雁風雪哀鳴覓稻粱

自知詩境本蕪荒每遇吟詩好逞強三月煙花游泰岱半生春草夢池塘淚痕雨積眉無  
彩心血塵飛鬢有霜貧女自悲金綫壓爲人空作嫁衣裳

憶昔聯吟共一堂弟兄推重白眉良已無棠棣爭春色只有梅花號冷花半榻茶煙人寂  
靜滿窗竹影月昏黃揮毫欲寫鵲鴿句纔寫鵲鴿已斷腸

棄婦吟

前人

命蹇不怨天心悲屢呼娘娘親生你女你女非不良十歲學機杼十一解作湯十二承教  
誨手亦善縫裳自知門戶微敢望百兩將十三媒作合童養歸壻鄉拜別生兒母涕泣兩  
神傷轉念身有託早嫁亦正當爾時夫尙幼垂髫同心郎晨炊讀書黍露采養蠶桑高  
妾身小冷露溼晨妝蠶多需葉廣力提幾盈筐眞筐備午膳敬獻姑舅觴遂即操井臼兼  
以飼牛羊風起牖生塵箕帚紛然忙夜半尙刀尺雞鳴何敢康爲郎留美饌妾願饜糟糠  
計今十數載艱難苦備嘗何期一朝忿竟爾參與商衾裯夫所御撇棄室中央鏡奩妾所

需拋擲在路旁今竟不我愔遽然迫下堂匪郎情決絕實妾命不減一步一回首回首淚  
幾行君縱不我念我豈君能忘心如梁上燕呢喃屢迴翔巢破無所歸哀鳴繞空梁燕巢  
燕能補妾願何時償前村有棄婦今日回蘭房伊夫負荊請曲奏鳳求凰我家人不見行  
陌心徬徨昔時采桑徑草深秋色黃秋蟲伊何悲悲蟲泣夕陽匏葉伊何苦苦葉那禁霜  
入夜夢見夫依然鴛與鴛兩心頗相愜並坐鼓笙簧笙歌奏未已歡笑羅酒漿魂悸夢忽  
醒斜月照空牀月落燈亦昏淒淒枕簟涼回憶昔年事風雨酸肝腸

早行七言分蒸韻

前人

短夢殘餘旅店燈聞雞起舞路先登馬頭霜冷毛生雪人面風寒淚滴冰煙樹白浮山欲  
活火雲紅捧日將昇馳驅壯志無時息萬里乾伸驥足騰

早行五言

前人

肩聳起鋒棱霜華曉氣凝晨雞啼月落征馬逐雲騰襟袖寒生雪鬚眉冷挂冰圖南人共  
勉雲路羨飛鵬



早行步青韻

前人

征旆不能停年年此路經  
雪生雙鬢白山簷一肩青  
疎樹挂殘月遠天明  
曙星我行殊未已  
踪跡嘆飄萍

天涯有遊子來往此途經  
霜印馬蹏白山迎人面  
青出村聞夜柝登嶺閃  
明星暮楚朝秦感浮生  
幾轉萍

早行步庚韻

刮面朔迎登車客早行  
郵亭數十里寒雁兩三聲  
人冷蜩形縮月明鴉影驚  
前村烟樹外應是老邊城

馬嘶殘夢醒千里路長  
征煙擁山村暗霜鋪石徑  
明衡陽寒雁斷函谷曉  
雞鳴人影微茫辨疎星  
照旅程

晚眺

前人

傑閣移居久登臨不覺勞  
滿城烟樹暝孤塔夕陽  
高風起驚霜雪寒吹上  
鬢毛倚欄人遠

眺時擁舊綈袍

飛閣出重霄憑欄意獨超朔風紅日隱斜照紫煙燒山影連天淡雲陰貼地遙不須愁晚景明月上今宵

城市厭喧囂行行出郭遙牛羊歸曲巷鴉雀噪寒條短笛吹童牧束薪負老樵心隨飛雁遠人立夕陽橋

遠征

前人

幾征漠北幾遼東又戍西涼出大同一路雪花邊地白五方旗彩漢雲紅并刀光閃千秋月塞馬悲嘶萬里風不戰不和頻備守權臣今古誤英雄

刀環馬策久從戎我獨賢勞嘆徂東萬里鄉心悲斷雁千軍豪氣吐長虹旌旗影暗窮邊雪笳鼓聲喧大漠風卅載關山歸夢遠封侯李廣老無功

冬夜

前人

一年年欲盡一日日無蹤今古露塵幻乾坤霜雪濃天寒愁入夜人老怕經多月落不知

曉驚聞遠寺鐘

詠千山無量觀二十四景詩

道人智光 郭永慧

玉皇閣

高閣崔嵬絕世塵，千華頂上證金身。  
有時亂墜天花雨，五色祥雲捧紫宸。

觀音閣

此地從無紫竹林，白雲窟裏塑觀音。  
煙鬟霧鬢蓮台淨，不受塵埃半點侵。

伴雲菴

翠岩高築小山房，隔斷紅塵入渺茫。  
到此便爲仙世界，何人老住白雲鄉。

三十三天

別有名天三十三，興來拾級任登探。  
舉頭試望絕高處，一色蒼茫接蔚藍。

振衣岡

誰把雲梯駕六鼇，千尋翠壁任揮毫。  
至今石上鐫蝌蚪，想見洪崖巨臂高。

萬年松

殿前幾代拂雲松，冒雪凌霜不改容。盛世棟梁今不少，深根永託碧苔封。

八步緊

絕嶮危崖步步高，脚根要立十分牢。遊人且莫頻回首，萬丈煙嵐接翠濤。

羅漢洞

古洞幽深造化穿，塑成羅漢列森然。排開後闕驚人眼，怪石奇峰別有天。

獅子峰

無須鐵額與金毛，終古蹲踞氣象豪。是崑崙真面目，千山虎豹一時逃。

臥象峰

鍾靈毓秀化工神，臥象成峯面目真。勝境由來貪客少，齒牙總有不焚身。

臥虎峯

電目眈眈氣勢雄，爪牙不異錦斑同。有時際得風雲會長嘯，一聲萬壑通。

猪首峯

漫把低昂問市屠分明白躡負山嶠忘機總屬林泉客幾度摩挲不我虞

蝦蟆峯

碧草池塘慣匿藏如何反踞白雲鄉儻能鼓吹蓮峯頂也把官私子細商

海螺峯

翠色千重擁黛髮遊人莫笑石頭頑也知絕島風波險螺髻高盤媚遠山

芙蓉峯

竚立閒階覽峻峯雲端現出玉芙蓉山靈惟恐淤泥染植在高岡伴古松

聚仙臺

縱步仙臺眼界寬山間晝永足盤桓倦時一枕羲皇夢不羨嚴陵七里灘

無根石

凌空拔地傑然存擬向南宮細討論底是崢嶸奇怪石也同芝草竟無根

响音鏡

玲瓏塔

層層挺出碧雲叢七級玲瓏面面通雁塔題名君莫羨莊嚴只此是神工

松抱石

磬石<sup>响</sup>網磴形自古虬松環抱態尤奇天然一種情深處翠繞雲根永不離

太極石 道光二年六月二十四日翻身

道本先天一氣傳須從順逆悟真詮時人不識金丹旨故使靈根顛倒顛

石龕松

絕妙山前小石庵無煩斧鑿即神龕憐他頂上孤松影常被氤氳瑞氣涵

正直松

不偏不倚翠叅天直節堪當玉笋聯遙看龍鱗懸塵尾令人頓詠羔裘篇

密松坡

探奧搜奇費刮摩依稀石上鑿松坡濃陰翳塵苔文古知是星霜閱歷多

松柏侶

一松一柏總相憐相對相當傍佛岩莫道無心爲伴侶交柯連理已多年

詠千山四首

慈祥道人吳教滋樹古

峻嶺奇峰迥不羣翠微碧落總難分樓臺掩映開仙境嶺洞幽深絕俗氣盛世名山谷隱  
逸釋家道院護殷勤幸居福地宜留詠搜索枯腸愧少文

谷口烟霞市市幾遭漸來深處遠塵囂風吹百樣花香發雨洗千章樹影高每遇霜晨觀罨  
畫偏宜雪夜聽松濤此間終歲饒佳趣徒步登尋莫憚勞

奚分春夏洎秋冬接引高人不斷踪五大禪林多古蹟卅餘道院稱巖峯及時覽勝襟懷  
爽結伴探幽興味濃夜宿山中忘世慮遊仙夢醒聽晨鐘

四顧崢嶸別有天慈祥瑞靄雜香煙松林茂密曾封萬峯嶂迴環詎止千畫者欲描仍不  
盡山人有詠亦難傳必須逐細身親歷異境奇觀始獲全

無量觀俗稱老觀昔人呼爲無梁觀

前 人

仰溯康熙壬午年千山道院記開先貴人贊助非常績始祖焚修有夙緣殿閣至今增氣  
象峯巒依舊繞雲煙觀中廿四標佳景我友郭公已詠全

五佛頂

由青雲觀至頂八里餘

前人

石雕古佛鎮名山靈境嵯峨萬壑環渤海南連空色外陪都北望渺茫間俯臨東嶺低千  
疊遙指西河縮一灣若欲升高開俗眼壯遊半日費登攀

普菴觀

係青雲觀上院在五佛頂以下有玉皇洞  
洞外有靜室二所普菴禪師在此成道

古洞綈綈塑帝容普菴法相謹陪從外增靜室燒丹好上有層崖積翠濃小住恍如登彼  
岸潛修直欲步遺蹤共爲五佛無雙頂洵是千山第一峯

仙人臺

台凌絕頂阻登臨石壁欹斜越二尋曾設雲梯今日去徒存仙像歷年深前人好險營危  
境使我探奇滅妄心游覽從來多古意盤桓日暮<sup>暮</sup>下嶽岑

雙龍觀

係朝陽宮上院在仙人  
台下古名松門雙井



上距仙臺一里餘古依雙井結茅廬繼資道力增輪奐永託神庥守靜虛石徑苔封人跡  
少松門雲掩世情疎清高澹遠超凡界據此修持合太初

龍泉

在龍泉寺

松排山面萬餘株泉以龍名勝畫圖溜曲波旋穿碧澗竹承木接到香厨煙籠髻髻藏鱗  
爪月印分明露領珠相彼流泉行處有如斯活水別山無

矩松

在祖越寺俗名歪勝松

多少喬松入翠微此松異狀合山稀折旋中度高盈丈橫直成材巨數圍人不循規人便  
廢事纔踰矩事何依行方守正通天地願效靈柯永不違

羅漢洞

岑堯萬仞翠峯前妙境清虛擬洞天法相如生塑羅漢靈岩似畫聚神仙推窗北望諸山  
小憑檻南臨衆壑連眼界宏開心地朗教人頓欲出塵緣

觀音洞

石厂營成洞向陽觀音寶相自端莊後先相繼虔心奉老幼同修美玉藏性定何須尋佛  
國身安即此是天堂祖慈孫孝誰能及一播芳名萬古揚

祖師法名性純徒孫圓亮祖師病臥八年徒孫  
事之始終不怠此乃絕無僅有之難事也

### 槐抱松

天地網緼未易知松生槐上甚堪疑枝頭橫幹從中別柯內盤根分外奇馬尾拂來龍爪  
動黃花綉出翠鍼垂寄身並育非人力雲蔚霞蒸雨露滋

### 獅子石

在慈祥觀  
共有六景

崎嶇蹬道接疎籬有石孤蹲貌獨奇不借人間椎鑿力頭顱面目儼如獅  
非雕非琢出塵囂威踞庵前六尺高更有一般奇肖處蒼苔蓋頂若鬚毛

### 象頭崖

瑞氣薰蒸毓秀靈崖前頑石亦成形宛如象首非陶鑄巧出天工勝範型  
蒼痕爲鼻白爲牙耳目兼全貌不差候曉分明瞳日映有時暖暉淡煙遮

### 探松峯

觀音殿北聳危峯峯外傾懸別樣松每值晴朝迎旭日瑞煙倒鎖綠陰濃  
石罅生根勢若堆細枝巨幹盡低垂山中草木皆昂發觀此方知造化奇

嵌松崖

廣生萬物土爲先異性虬松獨不然根託石中誠叵測幹橫崖下實堪憐  
長養艱難甚矣哉不知大造怎栽培一塵不染不染毫無土隻影相親但有苔

掃帚松

如針似蓋滿山中只此團松迥不同簇幹攢枝形若帚化生異種託神功  
孤植昂然八尺餘不偏不倚對茅廬觀中儻有飛塵擾願假山靈一掃除

如醴泉

活水澄清傍小庵烹茶茶細飲有餘甘先時浚發名如醴可比當年紫石潭

上古淳風出醴泉者泉如醴亦堪傳山靈默惠恩波久已被涵濡五十年

以上郭永慧吳教滋各詩皆係寫千山景物故並錄之不計工拙也

遊千山宿龍泉寺

七律四首

繆潤綬

東驊

看山策馬繞山行，馬上山光悅性情。  
挂笏久經勞夢想，叩關今始慰平生。  
寒融曲澗流春暖，翠滴層嵐媚午晴。  
喜煞山靈知客到，拏雲先遣萬松迎。

窮巖絕壑費搜求，訪勝人邀石點頭。  
雲展畫屏來四面，天開詩境豁雙眸。  
講經臺古空凡想，洗鉢泉清占上流。  
得造海螺峯小坐，盤桓一夕亦千秋。

恩恩晚照下蒼厓，萍水隨緣且住佳。  
席暖幸依方丈室，厨寒同守太常齋。  
一甌苦茗供清話，萬疊奇峯赴壯懷。  
詰旦更期登絕頂，芒屨竹杖早安排。

石頭高枕亂雲眠，信宿句留喜欲顛。  
得酒澆胸排俗障，聞鐘到耳想前緣。  
味參禪悅人俱佛，詩有豪情客亦仙。  
省識秋山紅葉好，重遊記取菊花天。

西閣春興

前人

門開紅正轉羲輪，出岫雲收及暮春。  
花氣帶風香入座，蘚痕經雨翠侵人。  
意隨山靜成盤古，心與天空絕俗塵。  
几淨窗明書一卷，公然我是葛天民。

偶成

前人

汲古修清課聽天且順時狂來猶按劍興到便吟詩  
暖日烘書榻晴嵐入硯池寥寥松石外遑復望人知

更不嫌孤寂煙霞結四隣松風餘太古花雨送殘春  
到耳無朝市揮毫有性真瑤峯何日

去終憶老成人

龍泉西閣本鄉先達王瑤峯讀書處

偕景仰山遊千山再宿龍泉寺

前人

憶別雲霞十四年又飛芒屨入龍泉重登福地真疑夢  
得住名山俗亦仙游侶悵難三友

共

修宣二擬同遊以事不果

吟身來在百花前客窗禪榻俱無恙一笑相逢證夙緣

琴劍當年迹已蕪聽松舊事話模糊風塵逐隊悲今我  
泉壑多情識故吾香火一堂僧飯早書聲五夜客鐙孤  
關心多少鴻泥印欲訪梅花問有無

禪關覺路轉層層幢影茶煙感不勝著屐已非年少客  
入門驚失舊交僧

思禪上人恒化已久

青天霧

散詩留墨

癸酉秋題十六景詩墨痕猶在

古殿雲深佛有鐙好認瓶峯尋往蹟

瓶峯晨翠在西閣前為十六景之一

升高早辦一枝

藤

獅口鐘聲到耳秋獅口鐘聲亦十六景之一亂峯深處喜回頭詩添逸興蘇兼米夢續遊仙阮挈劉酒

何辭今夕醉嵐光如為故人留琴裝硯匣忙收拾西閣窗開一放眸

龍泉十六詠

前人

千山山脈自長白發來於遼左諸山獨推幽秀中建五寺最著者曰龍泉相傳十六景寺僧選工寫圖裝裱成冊以待山遊者之題詠同治癸酉余讀書寺中曾經留句今十五年矣狼藉塗鴉墨痕猶在爾時方攻舉業風雅未嫻舊冊重披一讀一汗讀竟用依原體再賦斯章昨固云非今未必是亦聊作後遊之紀念云爾光緒丁亥二月既望

客窗高出碧峯巔一點燈光破暮煙我是孤檠舊知己書聲曾伴五更天西閣客鏡

可有楊枝灑萬家曉嵐滴翠到檐牙癡心擬共山僧乞移傍書窗插杏花瓶峯晨翠

水到僧厨靜趣生鐘魚時在耳中清通靈誰信山泉活流入空門也梵聲龍泉演梵

石聳高臺淨掃除山風細細午晴初醉攜一卷松陰坐我不談經自讀書講臺松風

溶溶月皎照瑤枝石徑循行合有詩惜我此來春尙早梨花猶在未開時

石徑梨花

摩崖書法撻天才生應何符語費猜元秘要將疑案破除非再起古人來

吐符應生

四字爲明

巡遊侍御盛秦字書解者紛紛莫衷一是

開門坐對石頭頑背轉前峯一笑間豈是禪僧真退院回頭只看自家山

石門彌勒

像倒坐故

云

擎龍枝幹翠摩霄刷耳聲驚捲怒潮驕殺小亭雄顧盼公然坐受萬松朝

萬松主照

靈巖鐘起月明中突地行雲遏半空莫入龍邱居士耳聲高原不減河東

獅口鐘聲

鐘樓建獅

子峯前

洛水呈奇叶禹疇何年化石落崇邱效靈畢竟殊頑質萬古朝陽不轉頭

龜石朝日

虬柯聳翠蔭危巒素影中窺一塔寒正似庭階交竹柏空明只愛幻中看

松門塔影

峯從盤折見嵯峨永夜能邀月色多誰料龜龍獅象外奇觀翻出一青螺

螺峯夜月

招提院小絕塵氛說法談空寂不聞悟徹禪宗何處去長留孤塔伴松雲

悟公塔院

粥鼓收聲遠幻塵山亭向夕不逢人丹青直入雲林筆殘照紅銜日半輪鼓亭落日

一拳長抱古心胸屈曲盤拏獨老松竟與石交成固結喬柯真合號猶龍蟠石龍松

依稀星彩散瑤光快雪時晴白滿岡添箇騎驢人恰好畫圖誰寫孟襄陽象山晴雪

偕景仰山登海螺峯作歌

前人

海螺之峯真螺旋盤迴天矯騰雲煙何年漂落層巒巔翻身倒捲噓青天生遇此奇不覩

何其慎我昔登臨甲戌始

同治甲戌  
曾登一次

說到重遊大歡喜東去龍泉近盈咫依稀途徑猶堪指

仰山聞之亦復躍然起出門快躡雙屐屐初過藏經閣旋出萬松亭雪泥沒蹀行鈴屨危

厓路僻無人經敗葉簌簌林風腥仰山卻步蹤留停白雲愛詩狂天空亂招手我亦疾呼

曰否否仰山解人不覺隨之走禽慶洵稱向平友兩人賈勇心膽雄手捫藤葛如扶筇履

險須臾歷巖腹早見雲盤一髻堆玲瓏迎眉嵐翠何龍蔥呼吸真與天相通挾來想出夸

娥功更進勢斜上盤折路忽梗穿鱗蛇行苔拂脛龍拏樹古枝作梯飄然已踏青螺頂左

顧祖越若臨淵右盼龍泉等落井低頭下視一片松雲翻恍疑碧海驚濤萬千頃此身搖



搖直泛艇我方敝舊好仰山結新知兩俱不可無好詩只惜未挈玉壺琉璃卮酸寒枉被  
山靈蚤搜奇差喜從吾好天台竟許劉阮到隨俗浮沈大有人神山遠望空貽笑平生不  
作凌虛遊安知三十六洞天中有玄妙

西閣雜憶

黃卷長披夜青鐙欲曙天雞聲山寺早人起早雞先  
敗葉撲窗櫺狂飊生木杪夜<sup>半</sup>起開門虎聲山月小  
楸枰煨滿鑪坐聽松濤灑身比浮雲閒胸有陽春在  
夜黑風怒號窗鳴門洞闢擁衾生峭寒天明萬山白  
雪齋吐明月照人詩骨清不嫌寒氣重义手立三更  
兀坐愛山春精神日抖擻吾伊數卷書揮灑一杯酒  
入坐豔春光花開到海棠東風解人意吹送一枝香  
快雨降崇朝雨過羣峯朗機暢神亦流滿地飛泉響

南薰入長夏衆木蔚成林不辨山何處開門但綠陰  
赴澗水奔流龍歸雨乍收浮雲真得意飛舞亂山頭  
秋高啓四窗峯峯翠重疊一夜好霜來詩心愛紅葉  
晚向南窗立看山不倚筇僧樓明月滿飛出一聲鐘  
當時新種松蒼翠干霄起約畧說前游棋聲一彈指

游南泉庵

危巖夾道起松風澗底泉流雪乍融清絕似將琴譜讀  
榻來人在水聲中  
清幽地不厭重尋蘿徑闌行稱鶴心紫館丹臺仙境好  
遙看只有白雲深  
山寒二月尙風霜早見山花發嫩黃出色能開冰雪裏  
靈苗畢竟異尋常  
羲皇枯坐寂無情殿奉  
三皇小憇雲房道侶迎  
餉客誼殷茶不潔水泉翻  
累在山清  
雲煙變滅出樓臺  
蕭寺晴嵐妙化裁  
回首龍泉天北指  
李將軍畫望中來

山中春半猶饒風雪惟  
南泉一路冰花早開  
茶味帶油  
腥氣故云

偕景仰山王聘之韓紀五登五佛頂

前人

游山不到青山巔何由放眼窺蒼天登山不造萬山頂置身亦復平地等千山信美龍泉  
游水清石瘦樓臺幽徑墨守無他求毋乃坐井之觀同拘囚咄哉五佛喻此旨延頸見  
招差可喜我急狂呼仰山起王韓二子汲汲追隨躡芒屨出門踏亂石樵徑開蓬蒿寒聲  
到耳飛松濤不覺人與山俱高普庵洪光道成去不返至今空留石洞摩雲霄

道至今山半

洞壑有遺像

道人喜客來烹水黃葉燒飲我快比醍醐澆此行殊覺神逍遙五佛座更高百

普庵洪光兩高僧相傳於此證

尺疊嶂懸厓夔攀仰巔頂未歷終闕然再約同人升而上面壁層層石磴旋天與游人留  
一綫旁視澗窈深上窮路中斷意奪神搖目爲眩幸有松枝橫作梯不然自厓而返空興  
歎歷過九折險更作乘風行五佛失其一四佛次第歡相迎回眸忽訝衆峯縮舉頭但見  
羲輪明使我手舞足蹈得意鳴劃然一嘯天爲驚吁嗟乎造物呈奇弄機巧山高遂使游  
蹤少石佛空向山頭老閉目攢眉狀枯稿世間萬緣胥付有情人惟有飲酒歌詩行樂好  
何苦風風雨雨坐危巔我爲石佛一笑倒

花朝雪後探祖越寺無量觀諸名勝

前 人

雪霽日卓午步出龍泉口同人喜花朝碎踏瓊瑤走樓臺起天半祖越一峯陡獨鎮羣嶽  
書摩崖大於斗只念他族逼勢成畫地守僅僅尺土存何異南渡後

證以陳夢雷游千山記寺基為無量觀占去十分八九

老僧恰有情鼎煎茶味厚松風吹塔稜不覺坐談久

策杖寺門東雪堆石磴淺路逢太極石摩挲剔蒼蘚三字認倒懸筆鋒極開展上有翻身

年月日記無舛石刻道光二年六月二十四日翻身十二字想見造化工大力為舒卷雷電風雨霄誰言石不轉

神老納云翻身

風雷雨

東北路漸高陡覺襟袖冷天風鳴雪濤山門蔭松影飄飄小蓬萊樓殿何幽靜依稀入茅  
山恂恍遇葛嶺道人知我狂引登後山頂洞幽住羅漢道祖坐與並仙佛本一家何用界  
畦町凌風發狂言青山已解領

臥石歷坦途緩步叢林下峯巒各森蔚幽賞何如者咄咄振衣岡相見何暮也

前游略未及此

大筆

如椽飛浙人向程寫氣勢幻龍蛇剛勁亦瀟灑坐愛松樹間雪溜涓涓瀉

踏凍登觀頂三十三天高洞暗奉南海室幽宿仙曹放步來前庭四顧情何豪俯視勦無

底萬竅松風號凜乎不可久笑下層巒坳

歸路認危磴隨山百盤折力倦憇幽巖松搖一身雪競談泉石奇詩懷倍清澈步下山門  
來行行誦碑碣孤塔暮煙生斜陽在山缺

游大安寺看山喜賦

繆潤紱

突驚山壁立門戶豁然開別創雄奇格真逢卓犖才壯觀窮造化餘子陋塵埃蔗境論佳

勝甘原在後來

山游者以途徑僻遠  
五寺中多後至大安

觀山同相士氣象出羣難嵐影飛輦底騷懷躍筆端怪峯魁五寺全地控三韓獲遂鯤鵬  
想還應屬大安

大安十六詠

前人

千山以幽秀名大安一角則獨稱雄曠通明金剛唐王瓔珞諸峯東西排列有壁立千  
仞之觀中則門戶洞開南視鳳岫諸山拱若列笏洵天然奇境也惜游蹤罕到相傳十  
六景語近俚俗稱道甚難因約仰山逐加修正各綴以詩非敢浪逞才華以聊記勝遊

於不忘云

雍容坐鎮不矜才保太山青御幃開左右諸峯同武衛分班齊拱一尊來

保太晴嵐

六師當日下遼東駐蹕曾高破敵功自將奇兵誇一戰青山從此屬英雄

唐樹擁翠 唐太宗征高麗相傳駐蹕此山至

今寺僧猶呼爲

唐王座落云

狀貌猙獰萬古存龐然來與鎮山門要他壁立高千仞護法纔知佛界尊

金剛鎮地

兜羅棉認有無中繞指雲煙造化工不必拈花原解脫從來妙手只空空

佛手擎空

碩果長留閱歲華三千年熟莫輕誇無疆若問南山壽盤古曾開海上花

碧桃獻壽

西峯勝絕指香鑪紫藹光凝夕照初一樣蕪蔥佳氣在看山何必定匡廬

香鑪暮靄

跌坐空山不計年慈雲涵養洞中天何當普遂羣生願一灑甘霖徧大千

石洞藏雲 洞塑觀音羅漢像俗呼羅漢洞

比肩英彥二難收青入禪關醒睡眸寫照若從高躅論不爲禽向也巢由

雙峯排闥

琳琅井鑿最高峯飲馬誰留世外蹤上界豈容凡骨到奔泉只合有神龍

懸崖飲馬

山水風高策杖行掃苔誰與下階迎一枝白塔當關立接引還推佛有情

寶塔迎風

紫綬金章列上台青山生而是誰開游人轉笑曇雲俗不捧香花捧印來曇雲捧印

離離香草綠何因發向山巔不水濱截葉為編堪作紙寫書惜少牧羊人蒲町長春

華屋山邱感廢興空餘舊蹟指山僧閣高只作憑虛想不比龍泉有客證西閣凌虛

玲瓏烘透夕陽殷人喜天光靚隔山絕壁公然開一竅生成誰信石真頑通明夕照

石室相傳有虎棲蓬蒿高竟與人齊寫圖正要留三笑乘興何妨一過溪石棚臥虎

層梯高步快清游潑眼嵐光繞四周幸不閤黎慚飯後且舒遠眺一登樓鐘樓遠眺

### 游雙龍觀

前人

鶴觀起山坳長松靜瀉濤地標雙井異

殿前井二相去二尺餘一甘一苦觀以此得名

天仰一峰高

自觀而上為仙人臺

境僻魔常擾

風腥虎怒號

地多山樺木魅時虎聲

道人丹熟否新冢亂蓬蒿

道士指觀前荒冢累累云近日以崇殞者又七人矣

### 偕仰山聘之紀五登仙人臺

前人

五佛頂已推孤峭探險曾飛游屐到豈知更有仙人臺橫絕南天壓羣嶠多少游蹤空遠

眺雲端枉惹浮邱笑我有嗜奇癖躡屨扶筇來取徑雙龍觀手撥荆榛開履冰踏雪攀陰

匡同人躍躍相追陪寒生雙袖無纖埃上界風光要親領鼓勇直登碧峰頂午日當頭慘  
不紅照落蒼巖澹人影腳底松翻舞萬龍俯聽一片驚濤冷層巒疊嶂盡猿蹲那敢公然  
論平等摩挲剔薜壁俯仰生遙情不逢仙對奕但覩人題名錫聘之  
學士鈞純陽笛子晉笙可還鼓  
吹來相迎青鸞不舞鶴不鳴只今傳有枯棋枰吁嗟乎英雄每被神仙誤三島十洲但煙  
霧餐芝餌尤求長生紅顏誰藉丹砂駐何似尋山問水掉臂行凌虛快作登高賦使我胸  
中奇氣吐蠅頭蝸角日營營幾人曾放高空步我輩能游便是仙不須遠問仙何處

自仙人臺下尋香巖寺

前人

山不絕頂登眼界無由拓但爲絕頂觀游蹤亦太畧不見縹緲峰外多美邱壑游山等讀  
書所貴在精博胸非富五車焉能古今灼峭拔仙人臺已快騰雲屨西下有香巖而不雙  
屐著如墨守六經羣書束高閣聞見陋拘墟硜硜絲自縛豁我浩蕩胸還共同人約勿憚  
路阻深速展陽春腳天荒自我開奇想龍門鑿赴澗蛇碗蜒爬沙蟹郭索下歷千由旬幸  
不途徑錯出險覩頽陽殘紅半銜愕飄然墜梵宮縉流盡驚愕咄咄飛將軍真從天上落



若非淩波仙除是翔風鶴不然萬丈崖安得崑崙躡自負狂生狂腰腳不爲弱何嘗餌金丹且擾杯酒酌一笑憇禪牀解衣大磅礴

香巖十三詠

前人

但耳仙人名不謀仙人面爛柯棋一枰河山幾征戰拍手上高臺笑看浮雲變仙人臺

傳世推名山辦香人幾箇祇今最高峰多奉觀音座嗟嗟吾道孤乃輸佛力大觀音閣

靈蹟指西巖一潭清水注朗可鑑鬚眉不見騰雲霧咄哉山上僧云是龍藏處龍潭

鍊師去不返石上空莓苔我非鍊魔人魔多驅不開剛遣酒魔去又召詩魔來鍊魔石

大安百丈厓曾寫玲瓏照香巖千仞峰亦開混沌窳依稀瘦鮑間才華雙入妙通明石

優曇花爛開鉢盂長挂壁不逐白雲飛時借清泉滌我無七步才催詩莫輕擊鉢盂石

祖師何代人浮圖傳不朽我來叩禪扃聞風亦低首沒留千載名能如雪庵否雪庵塔

鸚鵡出隴西曾說開元事何年剛風吹化作山頭翠怪石不能言青山可人意鸚鵡石

桃花山半開人怯淩空步中有石橋通隱約天台路檜溪無底深可許劉晨渡仙人橋

凹凸峰巒排妙具天然質水晶與珊瑚渺矣非其匹橫掃千人軍誰有凌雲筆筆架峯

石洞闢幽巖何年力士斧香火奉其間開山想禪祖遙遙西北天普安同萬古雪庵洞

殿前秀古松枝幹擎空起清風朗月宵蒼勁殊可喜聲飛萬壑濤陰鋪一庭水古松

才人鬪奇思妙筆空中騰忽忽仙風來北為雙塔棧吹落東山巔倒插青天層雙塔

過聖清宮贈道者

前人

客來渾不解周旋黯對長松坐暮煙已作冢中枯骨看丹成真有幾人仙

度大安北山至鳳朝觀探冷洞

前人

觀以鳳朝名洞穿巖腹冷游蹤到未能私懷常耿耿早齋辭大安策杖度北嶺崎嶇二里  
餘喜見茅庵頂松勁風有聲厓陰日影飛恰逢女導師引入蓬萊境屋後石竇開疑是千  
年井進探寒砭肌少留爽侵脛雲豈龍久蟠露直鶴同警未嚙雪窖氎恍坐冰海艇熱念  
全掃空醉眸先嚇醒人間煙火無心透太虛迥炎炎溽暑最天客來詎煩請妙絕清涼居此况  
吾親領始歎造化工竟無奇不逞得住此玉壺三生抑何幸所惜凡濁軀驟難萬緣屏叨

惠雲英漿且享一甌茗

中會寺

前人

峯勢無偏倚論禪亦大乘地形星拱極世運佛傳證巖穴中和氣樓臺上下層長年享清福妒殺此山僧

留別千山二首

前人

幾日琴裝駐翠微  
息又與白雲違肯辭濁酒杯  
頻舉忙草新詩筆亂揮泥雪聊憑鴻爪  
記嵐光爭逐馬  
曉飛殺風景惹青山笑不候穠春卻早歸  
須臾對面已天涯  
猿鶴情難挽去車送我出來千澗水負他別後一山花  
鞋都踏破猶探險  
棋未觀殘苦憶家  
奢願何當棲隱遂結茅長與伴煙霞

歸路望山作四首

前人

老樹彎腰送客浮  
雪招手留人何異天台劉阮被風吹  
落紅塵雲氣白隨雪  
化日光紅射嵐浮山是遠看倍好  
勸人馬上回頭

人稱靈運山賊自笑次公酒狂收拾層巒疊嶂一齊裝入詩囊  
有情流水趨壑無數奇峯插天久住白雲深處當時我亦神仙

平夷賦并序

明武鄉侯趙輔

建州一衛女真東方之黠虜也深處萬山林木障天晴晝如晦恃險負固已有年矣永樂  
間開原降虜楊木<sup>本</sup>黠戶者悖逆率數百騎往投之其黨類遂滋日寢強悍我成祖文皇帝  
靖難之初閔生民之艱不即加兵姑撫綏之彼狼子野心終懷覬覦迺守邊將吏弗能  
制禦以致猖狂算過一歲間寇邊者九十七次殺虜人口十萬餘皇上震怒乃興問罪之  
師以臣輔挂靖虜將軍印授以成命總統戎師復以太監黃順少監張璘監督軍務左都  
御史李秉提督兵戎副參厥事則都督王英武忠總督糧儲則僉都御史張岐督陣紀功  
則監察御史孫珂崔讓呂雯邊鏞往來遊擊則都督王銓都指揮韓斌協同遊擊則都指  
揮黃欽分兵出戰則遼東副總兵都指揮裴顯左右參將孫璟周俊摧鋒破敵則都指揮  
楊嶼柯忠曹廣戴廉楊廣海榮楊玉孫能文寧崔勝焦貴白欽盛鑑指揮閻斌冀暉李讓

宋守忠等綜理營陣則都指揮曹浩劉通傅海王鍇護遞饋餉則都指揮陳信郭瑄通得京營與遼東漢番官軍五萬餘眾各秉忠赤咸奮敵愾俱以成化丁亥秋九月二十有四日兵分五路深入虜地左掖左哨出渾河柴河越石門土木河至分水嶺右掖右哨由鴉鶻關喜昌口過鳳凰城黑松林摩天嶺至潑猪江中軍自撫順經薄刀山黏魚嶺過五嶺渡蘇子河至古城期以是月二十有九日大兵齊舉時則有若朝鮮國亦遣中樞府知事康純魚有沼南怡等率兵萬眾以助官軍皆如約抵虜巢無一後期者勢撼山岳聲振天地虜望風披靡譬之破竹迎刃而解擒斬俘獲虜酋揮指苦女等以千數賊屬牛馬無算巢穴蓄積蕩然一空收其被虜者歸厥家間有遺寇奔遁深山以保殘喘一月之內虜境蕭然時積雪盈尺寒風裂膚不可久居乃整兵凱還尋有遁寇指揮張額的里率其妻赴軍門哀詞乞降且曰吾所處之地自唐以來人跡罕到太宗征東至鳳凰城而止亦未嘗入吾境上今天兵卒然至此使我父母不相顧兄弟妻子盡被擒戮家產已盡死亡無日豈非天耶遂具奏納之予惟建州之地東南接鴨綠江朝鮮國正南則三江月虎城正東

則毛隣衛七姓野人黑龍江奴兒干諸夷東北洎北率皆海西四百餘衛野人女真西北又秦寧福餘朵顏三衛之虜賊也而建州實處其中左右前後盡爲夷狄相與聯絡犄角應援五營喜昌石門又咽喉之地人不得並行騎不得成列乃一夫當關萬夫莫開之險今王師一舉直擣其中長驅席卷所向無敵誠我皇上德動天地威播華夷神謨廟算之所致也其萬萬載太平無疆之休又肇于此矣予觀厥成不勝雀躍謹拜稽首而作賦曰

上御奉天端拱南向金印白麻授鉞命將帝曰建州之虜會世受國恩之曠蕩茲乃悖逆毒荼我邊實罪大而惡極宜天討以殄殲惟渠魁則罔赦在脅從而悉蠲臣拜稽首天子萬年臣聞建州女真東夷猾虜食肉衣皮山居林處藉弓矢以憑陵恃山林之險阻其心狡黠其力强固蛇突豕奔倏來倏去曰漢曰隋且綏且撫偉矣唐之太宗乃奮東征之舉僅勒馬於鳳凰之山敢肆志於豺狼之所茲行斷出於宸衷廟算敢乞於當宁帝曰兪哉汝其徂征闕外便宜付託在卿臣拜稽首載懼載兢爰整其旅于焉啓行征車彭彭以載

道旂旒央央而嚴程發通津而出山海歷義錦而抵廣寧覽滄海之浩瀚躡閭山之晴嶸  
遼海一水而三岔襄城百里如砥平乃營細柳乃閱大兵帶甲十萬鐵騎如龍弓刀鱗次  
旌旗蔽空將士賞勇如虎如熊精忠炯炯兮貫日瞻氣堂堂兮如虹揮金戈兮止白日擊  
鼙鼓兮轟雷霆威信洽而心志一賞罰公而號令明列八陣布三軍紛鳥蛇而變熊虎配  
天地而合風雲左哨出柴河而掩乎東極右哨襲太行而搗乎老營左掖右掖前軍後軍  
中營握機總掌權衝發撫順而長驅五嶺由喜昌而席捲古城潑猪江之巨浪洶湧摩天  
嶺之羣峯嶙峋鴉鵲關險逾於蜀道鳳凰城高並於嵩衡黑松林之森森當白晝而如晦  
石門山之轟轟時積雪而如銀樹木蒙密蠓蠓過而猶礙鳥道懸絕猿猱懼而愁捫蠢彼  
虜賊負固并吞剽絕壑爲濠湟樹巨木爲城郭晝則拒戰夜則衝突羽鏃蝟飛兵刃相薄  
移日之間轉戰百合雖周之獫狁漢之匈奴未有能過之也於是我軍賈勇敢奮發怒  
髮衝冠目眦盡裂乃陳三軍乃召五丁伐鄧林碎崑崙刷渤澥填東溟馳龍媒以蹴踏驅  
虎賁而咆哮揮倚天之長劍彎滿月之烏號神鎗發而火雷迅擊信礮舉而山嶽震搖盡

虜酋之所有罔一夷而見逃劓其心而碎其腦粉其骨而塗其膏強壯就戮老稚盡俘若  
土崩而燼滅猶瓦解而冰消空其藏而瀦其宅杜其穴而火其巢又有朝鮮之一國率兵  
萬衆以効勞搜天門垂地角刮海底而揚濤甫及旬日之內虜境以之蕭條外有毛隣強  
虜七姓野人四百餘衆之海西三衛朵顏之天驕無不心驚而氣喪瞻落而魂銷王師全  
勝以大捷征夫凱還而歌僥猶夏啓之伐有扈如帝舜之征有苗也由是遼左之民迎拜  
道邊簞食壺漿舉手謝言昔遭虎狼荼毒萬千今我安寧天子之賜我得飲食天子之與  
凡此更生不可枚舉是乃大威遠播廟算如神拓其疆而廣其宇誅其罪而弔其民陋漢  
唐之黷武昭當代之施仁神武大振於窮荒聖德光被於四表車書由此而會同華夷以  
之而一統桓桓猛士赳赳虎臣振旅回朝陞謁紫宸天顏怡悅海宇咸春報功行賞兮世  
其祿分茅胙土兮崇其勳雨露均霑兮九天降風雲慶際兮萬方寧簫韶九成兮百獸舞  
千羽兩階兮四夷賓耕田鑿井兮利其利出作入息兮堯舜民熙熙皞皞兮俗化美巍巍  
蕩蕩兮而天下蔑知所云也



西子賦

并序

房毓琛  
仲南

南國有佳人一顧傾人城矣蓋嘗泛錢塘而弔古慨吳越之遺圖美人已渺故宮安在芳草埋骨空江寫愁於是僕本恨人心驚不已噫嘻鋒冷魚腸冢荒烏喙鳩蠻人往鴟夷迹蕪吳儂弄水悵望江頭越女摧花淒涼殿角採芷若以相思訪苧蘿兮何地商女不知亡國恨楊花愁煞渡江人憶昔吳全盛之時簾音流野劍光照筵要離劫刺慶忌告終遂興闔閭之業遂走囊瓦之師泊乎夫差益支彼強仇將指之屢繫長頸之繩折姑浮之戈保勾踐之甲於是石田闢齊玉米乞魯驚督憤而琴遺獲朱鉏而車獻蓋已東侯屬也然而西子來矣曾幾何時甬東不封荆棘生社鼯鼯穴階君王之恨徒多兒女之情莫盡梧宮則彈指成灰花鈿則傷心委地慚白馬之迎神有如此水悔黃池之爭長遺誤於今蓋西子去矣而東吳墟焉客有懷古多情遣愁無計訪鬻薪之村泛浣花之水喚六宮之芳魂洗一湖之香恨用慨然而作西子賦者其辭曰有美一人若耶施女臉暈生姿眉顰欲語獻越珠辭寵吳金貯嬌籠香帳桃靨含羞浴賜溫泉蘭心半吐斯時也臺起姑蘇花紅煖

榭館娃宮曲響歷廊紆楊柳棲栗留之鳥  
麝蕪描蛺蝶之圖香在徑而可採花到手而堪  
愉照影則屏雕翡翠望春則簾掛珊瑚春風夕陽  
鬪雞有坊妾欲鬪草春風兒鄉兒願作  
白蓮花同心有藕君多樹紅豆子相思寄  
茫莫說懊懣且歌歡子君作磐石妾紉蒲葦愁  
聽越豔流雙淚兮深宮怕唱吳謳乍銷魂兮  
故里羌有恨而何言感情之若此一曲繁華  
消歸何有此恨綿綿長呼負負泛湖上之煙波  
悲苑中之花柳珠玉摧殘綺羅蠹朽前宵  
猶是結名花傾國之歡此夕何堪回清唱菱歌  
之首吁嗟乎渺渺吳宮寒煙井桐寂寂越  
殿芳草棘叢金爵繡土銅龍泣風鳥有歌而啼  
碧花無語而怨紅麋鹿跡散鷓鴣羽慵嗟  
霸圖之沈寂奚越女與吳儂能不愴然欲涕  
悲殘月於風中僕於是覽騷人之韻抱秋士  
之懷延佇江邊慨想遲暮流水自碧白雲不  
來惟見採蓮幼女結羅袂而唱湖上之歌歌  
曰湖中有西子湖上多蓮花蓮花入儂手西  
子不還家噫嘻水調歌清愁煞沈淪金粉江  
南曲苦那禁消瘦羅衫願緘辭於木末聊寓  
意乎斯文

幼安木榻賦

以虛館禮賢坐穿木榻爲韻

馬瑤林西池

管幼安遼東落拓硯北讀書久傷螳鬪小築蝸居那堪遭此干戈擾擾三國聊可蔽乎風  
雨草草一廬曾記席割身邊千餘載襟期獨絕憶否榻穿膝下五十年志節非虛方其遇  
亂多端避兵乏伴邴子情高華公氣短嗟漢室之凌夷却魏都之納欵越海國兮茫茫歸  
遼途兮緩緩來吾鄉者誰知阜帽之人適茲土乎安得緇衣之館爾乃兀坐空山僑居旅  
邸心密退藏耳煩淨洗欲探學海之淵未了書囊之底半窗明月爾室勿欺一徑落花吾  
關不啓筆硯外更無長物陶詠斯情名教中自有樂地防閑以禮惟茲榻也匪金匪玉不  
鑿不鐫質昭其樸性取其堅任委身以俯仰審容膝之安便製芙蓉以爲帳兮靡霜雪以  
爲毡撫裁桐之文几兮攤削竹之殘編疏水豈無真樂簞瓢果有高賢厥有太守公孫度  
識其爲道德之仔肩信其有聖賢之擔荷謂祇今物色不少寒峻慨自古英雄偏多坎坷  
彼旣肯來遊矣儘許可人吾雖能尊顯之敢強從我造嵇家之茅屋竊幸見所見而聞所  
聞謁亥叟之蓬門但云入則入而坐則坐於是榻前握手榻畔拍肩談心榻上抱膝榻邊  
事難與俗人言晦明討論禮本爲我輩設旦夕周旋笑伊立志悲歌徒事唾壺擊碎羨爾

課心純篤渾如鐵硯磨穿是以學有坐銘于無尺牘風月因緣烟霞心目事同蜀主顧隱士於草廬禮比周公下賢人於白屋祇覺貧而非病羞揮棄地之金儼教尊者就卑正借從繩之木方今皇上詢芻蕘闔閭相凜旁求士懷仰答問道鮮模稜之恥時設館以相延頌公多綺几之箴敢閉門而不納擬拜牀於北海座開孔氏之樽瞻試院於東方堂下陳公之榻

漁山樵水賦

以我將漁山而樵水矣爲韻

前人

竹溪逸民穆然而謂其友曰耄矣老夫怪哉小可覺世味其愈孤較人情而倍左釣名者有甚經綸伐性者曾何握荷我願爭捷徑我斧無柯我願戲中流我船無舵江湖浪跡那定風波蒲柳朽姿誰傳薪火名教中自有樂地既陸居亦復舟居生涯處絕少閒人是故我猶非今我我蓋觀山開樵市水繞漁莊漁辭山谷樵隔水鄉一則絕巘眩登竿垂大澤一則深淵懼隕薪析高岡一則江渚侶蝦蟇探虎穴一則林巒友鹿嘖釣魚梁然而山中之草木有緣漁者幾多知識水際之烟波無恙樵者強半遺忘可有波臣獨消受此風斜

雨細是何木偶率蹉跎乎日就月將我則將絲抽獨繭餌剖半猪舍舟鹿鹿遵徑魚魚枕  
可識丁岫真鱸簪尾堪如丙穴本鮪居曳翻峯背六鰲銜一鈎兮月小網漏石頭雙鯉觸  
三面兮雲疏天如賜以寸璜熊應符夢客或遺之尺素雁好傳書羨陰崖之仰咏俯吟儘  
許魯連觀釣謝茗雪之浮家泛宅省教陸羽問漁我又將投竿山下負擔水間十里五里  
前灣後灣披松濤聳折柳浪攀半江紅樹褪殘猜無鶴駭滿塢白雲排罷盟有鷗閒鶴影  
避煙喚煎茶之侍婢蟾光跳月呼斫桂之仙班有時逢黔谷桃花天長洞小何處拾越溪  
竹箭風直徑彎流坎坎兮斧聲矢志指河干之水誤丁丁兮碁韻回頭看局外之山其友  
乃悄乎思茫然疑亦欲云云而非想以不解解則費辭謂泉石膏肓儂頗彷彿怪烟霞錮  
疾史太支離何不聞富春渚高人宛在何不聞咸陽市仙客何之爾旣披漁蓑一領荷  
樵斧一枝爾胡不爾水爾釣而釣乎山之陲爾胡不爾山爾採而採乎水之湄欲緣木而  
求魚子其休矣夢掩隍而覓鹿我不與而逸民曰嘻此固知之易而何識不超或然何必  
不然其無局局一誤何妨再誤吾亦聊聊翁之樂者山林豈必食乎魴鯉客亦知夫水國

怡宜詢于芻蕘縱山可長魚終須意釣即水能生木底事肩挑姑妄言而妄聽水復山兮  
山復水如佯問而佯答樵對漁者漁對樵山何漁將漱石以礪吾齒也水何樵將枕流以  
洗吾耳也漁尋漁樵去一水從之樵訪漁來四山仰止山色與水光互映花明柳暗之中漁  
歌與樵唱相應月白風清以裏我所思乎山谷無會心則漁父傲人君其問諸水濱不談  
道則樵夫笑士視清涼而冷眼愧此青山冀富貴而熱心誓如白水已矣哉桃源返棹總  
是迷津石室爛柯已非仙里一自島開壺嶠渺渺若何幾經海變桑田茫茫如此漁如有  
意枯魚腹涸其誰生樵本無心稿木心灰而自死但得蓑衣臥處任他山冷如冰倘將斧  
柄持時果爾水平如砥志可爲知己道我其在高山流水間乎事難與俗人言我其在澤  
漁野樵外矣

安危須仗出羣才

以題爲韻

李文毓

古之所謂大將之才非徒寵膺推轂雄擁登壇森嚴節鉞豐偉衣冠其必有老謀碩畫義  
膽忠肝馳驅陔阻掃盪艱難氣豪萬物而不矜鎮羣情於弗靖力障一時而不怯挽大局

於將殘闔以外惟所制之一丸泥請封其險國有人未可爭也三尺劍足倚爲安泊乎有唐中葉人才漸弱軍政俱衰召募變府兵之舊功臣爲世將之基鞭非長而幾人遙領柄既重而數道兼司天下之勁鎮雄藩大勢儼同封建國家之銅符鐵券微權僅屬羈縻至羯胡敢妄覬朝廷宇宙釀沸湯之禍而副末亦起爭節度邊疆有累卵之危若夫蜀則尤岌岌也肅門庭於灌口重堂奧於成都拱京師而北瞰秦壠翼腹省而東下荊湖西據松維羗虜潛窺之地南臨蒙撒蠻獠雜處之區苟不能操撫綏之券握控制之樞將隙或生於貿易釁亦起於薪芻恐庸愚非管樂之才未必指揮而定倉卒起干戈之局難言摩厲以湏也又况宮闕遙則俗好稱兵山川深則罪多漏網民生困則子弟之氣搖時事艱則奸雄技癢儻非猛以濟寬教原於養戢其猖狂靜其擾攘幾何不鋌走窮鄉戎興伏莽懸車束馬猝難防斬木揭竿應如響幕闈之下皆巢穴或謀及陰召敵軍畿甸以南非版圖其勢已遙驚天仗且夫不遇崎嶇之險不知駿足之超逸也不遭颶颶之雄不知鵬翮之勁疾也不支峻厦岑樓不知松柏之無與匹也不涉驚濤駭浪不知鱉鼉之無或失也癡

疥易醫之疾非扁鵲亦可勉施其術也宮商平調之絃非師曠亦可求諧於律也金無躡躍之時非歐冶子亦可噓鑪而畢也骨無髓脾之所非屠牛坦亦可捉刀而出也老杜曰爲將者何獨不然乎慨自紛紜羽檄腥穢颯氣悒悒泣馬菟之鬼匆匆賀靈武之君山河有聲動鞀鼓天地無色悲風雲所賴詔馳千里勇振諸軍廣平王才堪爲帥李鄴才不徒文才若郭汾陽報國大伸偉略才如李光弼勤王聿著奇勳他如義旗四起賊勢旁分無蚍蜉螻蟻之援張睢陽龍盤虎踞壯凋瘵瘡痍之氣顏常山鐵骨銅筋此其功在扶危濟困即其才皆軼類超羣撫斯蜀者屏藩攸建朝廟無猜咨汝俾汝臣哉鄰哉須理紛而持亂須求變而弭災農商戰守之間內治外交謀要素喜怒哀賞刑之下水懦火烈道俱該斯足爲九廟萬民所倚恃庶無負上皇少帝之栽培奈何禍媒於柏焰熾於崔巖僕射無祠留像杜將<sup>軍</sup>險有酒盈杯固知良將籌邊有智深勇沈之目無那微臣憂國思長駕遠馭之才乃知有天下者官必惟賢權宜慎付用舍之際關盛衰興亡之機在舉措庸人當國則民心未可恃爲基偉器立朝則造物不能厄以數我聖朝久慶得人無憂遠顧威名無取



於哥舒勇力詎嘉夫僕固擁節握符之將才匹長城元戎專闔之臣才偕大樹安不忘危  
古之訓統海防邊備而制奇中以馭外大其規合水慄陸誓而貢賦

軼聞志卷四十

昔黃竹興謠齊諧志怪事涉荒唐爲正史所不錄然遐荒之所傳播遠而無徵事宜從略若近在一鄉一邑之間或得之父老傳聞或稗乘可考或遺蹟猶存其說縱近虛渺而亦嗜奇驚博者所不廢也爰述軼聞志第四十

丁令威化鶴 丁令威漢遼東人學道於靈虛山後化鶴歸遼集城門華表柱有少年欲射之鶴乃徘徊作人言曰有鳥有鳥丁令威去家千歲今來歸城郭如故人民非何不學仙冢纍纍遂高飛冲天而去清一統志作遼東鶴野人按鶴野縣遼時置屬東京金時屬遼陽府漢時並無鶴野縣名且鶴野因化鶴事得名一統志所載誤矣

王遼東 公孫度父延避居玄菟時玄菟太守公孫域子豹年十八早死度少時名豹與域子同年域見而親愛之遣就師爲娶妻後舉有道遷刺史以謠言免同郡徐榮薦度爲遼東太守初平元年自立爲遼東侯平州牧追封父延爲建義侯立漢二祖廟承制設壇墀於襄平城郊祀天地九年司空曹操表度爲奮威將軍封永寧鄉侯度曰我

王遼東何永寧也藏印綬武庫

取尙 袁熙袁尙與曹操軍戰敗奔遼東尙先與熙謀曰先到遼東公孫康必見我我獨爲兄手擊之且據其郡猶可以自廣也康心亦規取尙以爲功乃先置精兵於廐中然後請尙熙疑不欲入尙彊之遂俱被禽坐於凍地尙曰寒不可忍可相與席康曰卿頭顱方行萬里何席之爲遂斬首送於操

席障 晉太康四年慕容涉歸卒弟耐篡立將謀殺其子魔時魔年十五出走追者急乃避匿遼東徐郁家入屋以席自障追者發視竟無所見太康五年國人殺耐迎魔立之緒白馬 慕容廆有緒白馬常自乘之既爲石虎所圍力弱分將危陷棄衆將逃以此馬奔而韉之馬見鞍輒躡齧不得近乃止俄而鄴使至石虎國有難魔得旋歸至僞壽光元年馬四十九歲矣而駿逸不衰僞奇之比鮑氏聽命鑄銅以圖其像親爲銘贊鐫頌其旁象成而馬死

天門開 齊高洋嘗從文襄行過遼陽山獨見天門開餘人無見者及即位十年正幸遼

陽甘露寺禪居深觀惟軍國大事乃奏聞三月始還都

高麗秘記

高麗時蓋蘇文死子男生嗣唐遣李勣薛仁貴討之時侍御史賈言忠自軍中計事還上問狀對曰必克諺曰軍無媒中道回今男生兄弟鬪很爲我鄉導敵之情僞我盡知之故必克且高麗秘記不及九百年當有八十大將滅之高麗自漢有國今九百年而李勣年八十是行不再舉矣未幾果滅高麗收其城七十有六

寶珠黃衣

金顯宗孝懿皇后徒單氏以皇統七年生於遼陽母夢神人授以寶珠光燄滿室旣寤而生紅光燭庭世宗備禮納爲太子妃生章宗昭聖皇后劉氏遼陽人天眷二年九月己亥夜后家若見有黃衣女子入其母室中者俄頃后生性聰慧讀書過目不忘世宗選入東宮生宣宗

旱孤椿

俗傳打孤椿者謂天旱是墓中新死人作怪所致掘墓碎之則雨今尙有傳此說者昔明成化間醫巫閭先生賀欽言於當道禁其事後數年王備禦始至適天旱村民來告欲踵故俗王許之賀急投一簡論其妄且于國典乃止己而天雨訛言亦息後

有彭姓者以此惑衆王參戎杖其人火其書

龍王晚渡 遼陽東門外太子河岸舊有龍王廟相傳夜間常有老翁操舟濟人並不取利月中有見其狀貌者頗與龍神像相似故龍王晚渡爲遼陽八景之一其實廟前晚渡時夕陽人影映水波淪漪可爲一景耳

姑嫂城 世傳城東姑嫂城因明季經略楊鎬爲清所敗潰兵所過擄掠姦淫是地有姑嫂二人紡績於室兵欲亂之嫂與姑皆自殺村人嘉其節瘞於山坡舊有城址遂謂此村爲姑嫂城一說昔有姑嫂守此城敵至姑嫂力戰死尤無據矣

三家寨 即今城北八里蕭夾河該村有清乾隆年間契紙坐落三家寨緣村中舊有蕭張劉三戶因之爲名後蕭族特大遂更名又民國二年有人在村北掘土得明將軍楊五山墓志載其葬地爲玉馬仆未詳何說

雞王屯 城西南六十里村名相傳清高宗經過此地忽有大雞飛過曰此可謂雞王後遂以名村

兵馬屯 城西二十里村名村廟北有土台村南二里有烏龍台相傳唐征高麗在此屯兵因以名村

烏龍台 城西二十里村名村後舊有土台土人言台上有古洞甚深有烏龍居之遇旱時祈雨頗有靈驗因以名村

昇仙橋 在東門外相傳丁令威得道化鶴立橋上飛昇故名今僅存片石而已

斷魂橋 大西門外護城河上架橋兩座諺稱八步兩座橋是也又西下頭有石橋此橋西昔爲刑場因名斷魂俗傳元代有山寇青面虎據首山又云據沙河南廟兒山又云據判官鑪東山十一郎被逮將刑由橋經過青面虎由橋躍出劫之去後遂移刑場於城內魚市口

白塔寺自來佛 城西北白塔寺即廣祐寺相傳塔下埋石匣藏釋迦佛一髮又謂有人自廣寧來遇一人云欲赴廣祐寺請負我行有厚酬負之行不覺其重行且速一日而至覺其重釋之則銅佛也今尚有銅佛三尊其一尊即所謂自來者然露立於公園矣

牛牯蛇窟 城西北五十里村名牛牯相傳清初農民某來墾其地僅備牛牯一付逐漸開墾成村故名牛牯村中有廟藏蛇甚多山門後有老榆一株大數圍當榆錢滿樹午日映門則羣蛇蟠樹有長數丈者有盈尺者廟祝云佛座下有窟無敢窺者乃蛇穴也

野老鶴灘 城北十八里村名相傳清始祖老憨王曾侍明總兵李成梁因其左右足皆有紅痣三成梁忌之欲解送京李妾某告之偕逃追者急李妾縊死老憨王逃至沙灘而伏適有羣鴉飛集追者乃他往既去有犬嚙其衣遂起而逃俗稱烏鴉爲老鶴因名其地曰老鶴灘清代滿人祭祀必祭喜樂媽媽即李妾也並祭烏鴉不食犬肉蓋以此按滿洲源流攷云布庫里雍順爲滿洲始祖居長白山東俄漠惠之野俄朶里城稱爲貝勒數世後國人叛之雍順之族有幼子名范察者遁於荒野國人追之會有神鵠止其首追者遙望疑爲枯木遂止范察得不死以此觀之其地應在長白附近不應在遼陽此殆後人附會耳

吉地生龍鳳 城北河工堡吳姓清初來自山東相傳其先世善堪輿自擇村南河灣處  
囑其子曰死當葬此但須裸體入殮葬後生一孫不類常兒家有白狗常臥房上家人  
以爲不吉斃之時欽天監謂遼東當生異人天象已著特有婁金狗掩之現已大顯乃  
飭地方官查明勅建廟一座於吳墳前以鎮之同時佟二堡劉姓墳亦係吳爲卜葬謂  
當生皇后在其旁穿一井未幾吳氏子劉氏女皆死土人咸以爲吉地生龍鳳云按吳  
姓墓碑有進士吳文杰撰文有始於乞瓜終於起柳句乞瓜見唐書酷吏傳楊宏義乞  
瓜於鄰不與遂以隣園有白兔告官官遣捕之其瓜立毀起柳見漢宣帝紀蓋生龍之  
說係怨家造謠誣陷而鄉人訛傳也故以乞瓜起柳爲喻

雪菴遺事 雪菴香巖寺得道高僧也相傳原充軍人家鞍山西勾家寨元代征役煩煩  
從征十年一日旋里抵家已夜半繫馬門外潛入借月光窺窗見妻與少年共寢忿極  
欲手刃之轉念紅塵煩惱殺彼何爲乃留刀而去蓋少年非他乃其女也生於離家後  
故不知也先隱於夕陽寺以妻女常往哭請乃避之香巖寺苦修得道焉



普安遺事 普安龍泉寺高僧也與其甥同出家甥法名洪光性甚愚騷普安將遠行洪

光問我何食漫應曰喫石塊問燒何物曰燒腰遂爲之料理米薪乃去比歸見米薪猶在訊之洪光以煮石對試之果然從此悟道得大解脫至今廟祝猶嘖嘖稱之

普安杖 普安遺杖現藏龍泉寺佛龕中光可鑑人昏夜置暗陬可覓見也近有人親試之未有鋸痕寺僧云清同治間盛京某侍郎遊山索此杖以奉母僧不敢斬無何鼓吹送還襲以黃絹並施香資乃去蓋其母拄杖便不寧也鋸痕即攜去時爲之也

唐鍋 現存千山龍泉寺唐征高麗所遺軍用行鍋也質係熟鐵體薄口徑四尺有奇兩旁有耳

皇姑菴 在千山之陽俗傳謂妙莊王之女三皇姑出家之所其事荒渺不足信考其廟碑建自清嘉慶二十五年或謂清代某公主施錢建菴故名碑志雖未明載廟中供有象笏其說近是現又重修更名斗姥宮

狗血塗佛面 千山西雙峯寺有樓供韋陀像僧言係昔年自來者不知何時大約總在

清初恐其再去相傳無論仙佛以狗血塗之則不能幻化他往故塗其面以留之聞者咸以爲妄而寺僧言之鑿鑿云

木屑柱 城東棲雲寺在寶淨山陽碑載此寺創自漢永平間殿凡五層工程宏大相傳始建時借佛法力木由井中來末後一顆未取出忽有人曰夠了此木遂橫井中井在後山今已湮矣或謂尙親見之殿柱缺一用鋸末和石灰與膠鑄之正殿右前方一柱即是然經多人諦視仍與他柱無異

石雞戒旦 城東南七十五里雞鳴寺中有石雞相傳唐征高麗駐兵於是山令曰雞鳴啓行夜未半忽聞雞聲即整隊適值敵來夜襲遂擊敗之蓋非雞鳴示警必爲敵所掩也惟當日空山無人何來雞鳴乃令軍士搜山至山坳又聞鳴聲出地下掘地得石雞遂建廟琢石雞置之寺中名曰雞鳴寺現有清道光咸豐年間兩次重修碑記皆載此事

老君木像 城東七十里老君堂村有老君廟村人皆趙姓清初來自山東黃縣先至海

界後移家北徙奉老君木像背負以行至此少憩欲再行則像重不可動乃闢土建屋居焉現廟中已改塑泥像原有木像仍列其中

蠻子淀 城西北四十里單莊子西北有瀦澤面積約數百頃深處丈餘中產蛤甚多相傳有蠻子某行經其地謂其徒曰此中有寶吾當取之俟手出汝須以劍授我乃泅以入未幾有毛手大如箕伸出取劍徒驚愕失措俄頃水滾波翻蠻子身首異處矣因此名蠻子淀

流星有聲 清光緒五年十月某日初昏時分有流星大如月自東南而東北行有聲經過之處光如白練橫空許久方滅

衆星如織 光緒十一年十一月初旬一夕九鐘時城西家信子書塾生徒夜讀方休出視天中有衆小星往來如擲梭閱時乃止人皆見之

蛟發冰開 本境氣候較寒嚴冬時河冰腹堅厚三四尺非來春驚蟄後不解民國四年冬十二月渾河下游蛤蜊河處夜間河岸居民突聞河冰砉然有聲如雷行晨起視之

見河冰割開上下一里餘土人以爲蛟角所割云又十五年十二月二十九日蛤喇河下三界泡處河冰割開長六七丈寬三丈餘冰開處厚三尺餘其冰塊或欹或立或翻在水上洵非人力所能爲也

白蓮教 同治六年城北旛杆堡有邪教趙錫百者乘物可以騰空剪紙幻爲兵馬小試其術煽惑鄉愚謂某姓子當爲皇帝聚合多人遂率之攻遼城北門知州張鼎鏞令人以狗血灑之其術立敗趙匪逃遁忽如顛如癡遂被獲餘黨潰散詎趙敗之後餘孽仍伏各處居民或白晝丢失兒童或夜眠髮辮被剪或雞鴨毛羽亦被剪落直至光緒十四年後此教始絕迹焉

義合團 光緒二十六年拳匪起自山東蔓延至奉天全省六月間遼境一般下流人亦羣起效尤其始術亦頗驗故附和者日多衣紅黃色衣持刀大呼自稱某神某佛大約爲正經正史之所不載男曰義合拳女曰紅燈照有八九歲孩童亦如狂如癡而隨之由城牆跳下仍能直立而不仆燒毀教民房間用塵尾一揮火燄隨之東西即不延燒

鄰舍斬翼長昌復從而縱之由是妖燄益熾惟知州陳衍庶具有真識不爲之屈匪首令其迎接陳曰吾頭可斷身不可屈匪以其強項而舍之洎最後戰禍釀成術乃不驗胥冰消而瓦解矣紅云國家將亡必有妖孽此之類也觀於此可以爲前車之鑒已

疙疸佛 城東南六十里疙疸寺村寺中刻石佛體具疙疸相傳此村中必有具疙疸之一人此死則彼生猶畢勒而罕轉世焉且此人必家境充足至今村中尙有一徧體疙疸者已六十餘歲矣惟此寺創立之緣起則無有能道其詳者

白虹竟天 光緒二十九年九月初旬一更向盡忽羣犬吠空出視見白虹二道自西南互東北南窄而北寬窄如寸許寬三倍兩端尖銳颯颯有聲光亞白晝刻許始沒有穆姓某者占之謂主兵象翌年有日俄之戰

日環駭人 民國十四年夏正十一月朔日初出有半環形縮其上環左右發極強之七色光狀極驚人時許方沒按日光七色非奇異也而談星象者謂此象見翌日奉軍平

亂是其兆也

皓月流丹 民國十六年四月十三日月上東南衆方仰望忽見月色如塗丹冉冉下墜入雲中反視月仍挂中天蓋墜者似月而非月也

... 之出於民... 則行... 乃不... 此可以...

... 中刻石... 此村中... 有一... 其...

... 九年九月... 其...

... 三... 其...